


MOMBOTO NA NYOKA

 Nzambe Molingami, Nzambe monene pe na nguya, Oyo asalaki biloko nyonso na nguya ya Molimo na Ye; pe asekwisaki Yesu Klisto, Mwana na Ye moko ya likinda, Oyo akufaki na bonsomi mpo na biso basumuki, Moyengebeni mpo na bato mabe, mpo na kozongisa biso kati na bomoko ya malamau tozali na yango lisusu na Nzambe. Ndenge tolakisami kati na Liloba epambolami, ete tozalaki na bomoko na Ye liboso mokili ezalisama. “Wana minzoto na ntongo ezalaki koyemba elongo, pe bana na Nzambe bazalaki koganga na esengo, uta kala, liboso mokili ezalisama.” Ndenge tokoki koyeba ete na ntango wana nde Mwana na mpate abomamaki; ntango Nzambe, kati na likanisi na Ye monene, Amonaki biso koganga pe kosepela na lobiko na biso kati na Yesu!

² Pe, na mpokwa oyo, tozali bobele na elengi ya liboso ya nkembo monene ya Nzambe oyo ekomonisama na Boyei na Ye ya mibale. Bokono nyonso pe mpasi nyonso ekosila. Na ntango yango, tokozala na nzoto lokola nzoto na Ye Moko ya nkembo, mpo tokomona Ye ndenge Azali. Awa, ezali biso komona maboko na biso konuna, suki na biso kokóma pembe, pe mapeka na biso kokita, toyebi malamau ete tozali bakufi pe tozali kokende na putulu epai mitó na biso egumbami sikawa, pe epai wapi toutaki. Kasi, Nkolo Nzambe, lokola Yo Ozali Nzambe, Olakaki ete tokosekwa na mikolo na suka, pe tondimi yango.

³ Totelemi ngwi liboso na Yo na mpokwa oyo na kondima na biso, kobelema na elikia mpo ete Yesu abengaki biso na yango. Ezali mpo na misala malamau oyo tosalí te, mpo tosalí eloko moko te ya malamau; kasi toyei na komikitisa, kotatola ete tozali na eloko ya motuya mpo na ngolu na Ye oyo epesameli biso. Yango wana, toyei kosenga Yo Opambola biso na mpokwa oyo, wana tokoteya Liloba. Mpamba te ekomami, ete, “Moto akobika bobele na lipa te, nde na Maloba nyonso makobimaka na monoko na Nzambe.” Tika monoko na Nzambe esolola na mpokwa oyo. Tika maloba ebima, pe Ekota na bozindo ya mitema na biso, bayoki, pe totondisama na Molimo na Yo pe na Bozali na Yo. Mpo tosengei yango na Nkombo na Yesu. Amen.

⁴ Le—lelo pe lobi, to lobi na mpokwa pe lelo, tolobelaki liteya oyo, ya liboso, mpo na kobanda, *Mpo Na Nini Tozali Ebongiseli Te*. Pe tolobelaki yango makasi mpenza, mpo na nini tozali ebongiseli te, pe mpo na nini tondimelaka bibongiseli te. Ezali mpo tomoni yango kati na Biblia, ete bibongiseli etiamaki na Nzambe soki moke te; etiamaki nde na zabolo; pe totalisaki yango na Biblia. Pe ete, na nzela ya bibongiseli, libunga ebandaki. Sikawa, tozali koloba yango mpo na kosembola pe komema Losambo oyo na boyokani na Liloba na Nzambe oyo

epambolami. Ete, elikia na biso etongami te likolo na makambo ebongiseli elobi, to moto nani alobi; etongami nde likolo na oyo Nkolo Nzambe alobi. Pe yango nde lolenge bobele moko oyo tokoki kosembolama malamumu.

⁵ Pe na ntongo ya lelo, natangaki, nakanisi, makambo mitano, makambo mitano ekesani oyo ebima na nzela ya ebongiseli, makambo elobama ata moke te na Biblia, makambo mangomba ya Misioni bazali kotosa, pe koteya lokola malakisi; makambo moko lokola mama mobange wana ya pite, lingomba Katoliko, ateyaka, pe ezali koteyama na lingomba ya Misioni. Pe tozali kotosa likambo yango moko oyo ekesani na nyonso kati na Liloba na Nzambe.

⁶ Lingomba ya liboso ya ebongiseli, tolakisaki yango na nsima na nzanga oyo, na buku ya masolo ya Batata ya Nicée, ya lingomba ya Nicée. Sima na liwa ya bantoma, Batata ya Nicée bautaki nde kuna, pe bakobaki bongo mibu ebele. Sima na mibu nkama misato na ntuku mibale na mitano, sukasuka bakendeki na—na Nicée, na France, epai wapi basalaki li—likita monene ya Nicée. Pe kuna nde esika basalaki bindimeli wana oyo lingomba Katoliko azali na yango sikawa, oyo epesamaki pe epai na Bamisioni.

⁷ Pe, ndenge nalobaki yango na—na malakisi ya ntongo ya lelo, “Eleko na lingomba moko na moko, kino na—na eleko oyo ya lingomba ya Batesaloniki, mibu nkoto na nkama mitano ya eleko ya molili, mbala moko te Azangaki koloba ete, ‘Obateli Nkombo na Ngai.’”

⁸ Pe na ngambo mosusu oyo, bazalaki lisusu kati na Klisto te, bazuaki nkombo ya ebongiseli, “Katoliko, Luther, Wesley, Batiste, Presbytérien, Pentekotiste,” pe bongo na bongo.

⁹ Kasi, liboso eleko yango esuka, Alobaki: “Natii ekuke polele liboso na yo.” Bomoni? Pe ezali nde eleko oyo tondimi ete tozali kati na yango sikawa, eleko ya ekuke polele, na kati ya bokei ya suka ya lingomba na Laodikia.

¹⁰ Pe esalaki mpenza mibu nkama misato na ntuku mibale na mitano kino na likita ya Laodikia. Pe kuna nde esika bandimaki makambo oyo, lokola komwangisa mai, kosopa mai, pe libatisi ya lokuta, molimo mosantu ya lokuta, ná makambo mosusu nyonso wana. Bandimaki yango.

¹¹ Pe na sima, ntango Luther, oyo azalaki sángó, abimaki na lingomba Katoliko, amemaki yango na ye. Pe uta na yango Zwingli abimaki, uta na Zwingli Calvin abimaki, uta na Calvin Wesley abimaki, oh, pe bongo na bongo. Pe bakobaki kaka kopesana bindimeli yango moko na mosusu. Pe ndenge nini Nzambe akoki kokamba Lingomba na Ye, ntango bazali kolanda ba-nzela oyo Ye alakisa bango te?

¹² Pe bomikanisela, na Emoniseli 17, tomonaki, “mwasi yango.” Sikawa, maloba oyo ezali polele. Ekomami kati na Biblia, bongo

nakanisi nakoki koloba yango. Elobami ete mwasi yango azalaki “mwasi na pite.” Elingi koloba azalaki mwasi ya lokumu mabe; ete asengelaki kobalana na mobali moko, kasi azali kosala pite ná mokili. Pe azalaki na . . . Azalaki “MAMA YA BASI YA PITE,” yango azalaki na bana basi. Pe toyemaki yango na nzela ya bitando, ezalaki na . . . Pe wana, ngai moko, ndenge nazali komona yango, kati na Makomi, komona malakisi na ye pe nyonso, nandimi ete Nkolo atalisaki yango polele, ete ekoki kozala eloko mosusu te bobele lingomba Katoliko. Ekoki kozala ndenge mosusu te. Pe abotaki banani? Mangomba ya Ba-misioni. Ezali mpenza bongo.

¹³ Pe asimbacki kopo ya vinyo ya pite na ye na loboko, pe azalaki kopesa yango na bakonzi ya mokili. Pe azalaki mokonzi ya mokili mobimba, na elobeli ya molimo. Pe ezali mpenza bongo. Lolenge mosusu te . . .

¹⁴ Botala, tika, tokoki kozonga na Daniele pe kozua ekeko. Botala ekeko : motó ya wolo, bokonzi ya Babilone; motako . . . to palata, ba-Medes ná ba-Perses; motako, Alexandre Monene, pe bongo na bongo, bokonzi ya ba-Grek; na nsima bokonzi ya Roma, Roma ya Estí pe ya Westí, makolo mibale.

¹⁵ Pe botala, kati na bokonzi zomi yango, oyo ekokani mpenza na maseke zomi oyo tolobelaki na ntongo ya lelo, kati na moko na moko ya bokonzi zomi oyo esengelaki koya, ebende ná mabele esanganaki. Pe ebende eutaki na makolo, oyo ezalaki Roma. Pe, makambo ya Roma esangani na bikólo nyonso oyo ezali na nse na Lola, na nzela ya lingomba Katoliko. Ezali solo mpenza. Pe basangisamaka te, esika moko te.

¹⁶ Pe babalanaka kati na bango, bango na bango. Biblia elobi bakosala yango. Pe botala bango lelo. Mwana na yo ya mobali abimaka na elenge mwasi ya Katoliko; ntango bakobalana, esengeli na bango kolaka kobokola bana na bango na eyamba ya Katoliko; bomoni, ngambo moko to mosusu. Bomoni, ezali mpo na kobebisa nguya ya moninga.

¹⁷ Kasi ezali nini? Biblia elobi ete likambo yango nyonso ezali pite. Sikawa okosala nini? Ya solo. Pe lolenge nini masumu na bato ekozua etumbu. . . Tozongaki na Dutelonome, mpo na kotalisa ete mwana makango, mwana ya ekobo, akokaki ata moke te kokota na koyangana na Yawe sima na mabota zomi na minei. Yango ezalaki na ntango ya mobeko. Pe Klisto ayaki koyeisa mobeko makasi. Koleka boni ezali lelo?

¹⁸ Likambo nini ezali kokómela bango, likambo nini na bilenge basi basila nsoni na balabala lelo, bilenge basi bameli makaya, pe balati bakupé pe bakati suki mikuse, pe bongo na bongo? Likambo nini? Ezali mpo bamama na bango bazalaki kosala bongo. Lisumu na nko, ezuaka etumbu, longwa libota moko kino mosusu. Ezali nde yango. Pe tokómi wapi? Tokómi esika moko, ezali bobele liboke ya masumu ya bosoto.

¹⁹ Yango wana Nzambe atelemisi Russie, kuna, ná bombe atomike, mpo na koboma ye, lokola na ntango ya mpela monene, ntango Abimisaki mapata. Na solo, Asalaki yango. Pe Biblia elobi bongo. Russie, ekólo ya bazáangi kondima ndenge bazali wana, bazáangi kondima, bazali bobele esalelo na maboko ya Nzambe na Nguya nyonso. Lokola Mokonzi Nebukadanesala asengelaki koboma Yisalaele mpo bazangaki kotambola elongo na Nzambe, Russie atelemisami mpo na “kobukanisa na ntina na basantu,” ya lingomba Katoliko, makila ya basantu oyo asopaki. Biblia elobi bongo. Akobebisa yango nyonso.

²⁰ Bongo, botala, soki mama na bango azalaki kobina miziki ya mokili, ná mama nkoko na bango, pe mama na bango azalaki elenge mwasi asila nsoni, ye azali nani lelo? Mwasi alongolaka bilamba na kobina. Bana na ye bakozala banani?

Pe okoloba: “Nzambe nde asali bongo?” Iyo misie.

²¹ Nzambe apesaka etumbu ya lisumu na bana, libota wana, kino na mabota zomi na minei. Bongo soki Klisto ayaki koyeisa yango makasi, tokoloba: “Mabota mokama, to mabota nkama mitano.” Botala, Alobaki: “Bosili koyoka bato na kala, koloba ete ‘Boma moto te.’ Ngai nalobi ‘Ye oyo akosilikela ndeko na ye, kozanga ntina, asili koboma ye.’ Bosili koyoka bato na kala koloba ete, ‘Sala ekobo te.’ Nde Ngai nalobi ete moto akotala mwasi na mposa mabe na ye, asili kosala ekobo.” Asalaki yango. . . Koyeisa makasi ezali nini? Ezali kokómisa yango monene koleka. Pe soki, na ntango ya mobeko ezalaki mabota zomi na minei, ekozala boni mpo na likambo yango moko lelo?

²² Pe bilenge mibali, ná mibali mpenza, ná mibali oyo babali, bazali lisusu komemia ndai na bango ya libala te. Oh, bazali bobele kozua basi, pe koyebana na bango nzoto bisika nyonso, lokola ba-mbua mpenza. Mbua azali na limemia pe na kobika malamumu koleka bato mingi. Nayebi ezali maloba makasi mingi, kasi ezali solo.

²³ Mpo na nini? Pe mangomba bazali kondima yango pe bazali kolobela yango te. Mpo na nini? Bazali kosala makambo lokola mama na bango. Mangomba bazali kosangola yango. Mpo ete, lingomba pe lingomba oyo ya Misioni euti na lingomba Katoliko, etumbu ya masumu ya lingomba Katoliko ekokwela ba-Misioni. Ezali ya solo, na boye nzungu ekolobela mbeki te ete ezali na “bosoto”. Ezali mpenza solo.

²⁴ Sikawa, tomoni, pe kati na Makomi, tomonaki. . . Pe namoni lokasa moko te likolo na mesa awa na mpokwa. Nalobaki: “Bolakisa ngai esika moko oyo Nzambe asila kobandisa ebongiseli. Bolakisa ngai esika moko oyo Nzambe asila kotia mwasi motei. Bolakisa ngai esika moko oyo Nzambe asila kotia komwangisa bato mai. Bolakisa ngai esika moko oyo Nzambe asila kotia kosopela bato mai. Bolakisa ngai esika moko Nzambe

asala ete babatista moto na nkombo ya ‘Tata, Mwana, Molimo Mosantu.’ Boluka makambo yango.” Ata bongo, tozali kokoba kosala yango. Makambo yango ezali mpenza kati na lingomba.

²⁵ Sikawa, nalobaki: “Ntina tokoki kozala ba-Batiste te, ezali mpo biso tondimaka ete esengeli kozua libatisti na Nkombo na Nkolo Yesu Klisto. Ata moto moko te, kati na Biblia, abatisama na lolenge mosusu. Bolakisi ngai esika moko oyo moto moko abatisama na nkombo ya ‘Tata, Mwana, Molimo Mosantu,’ nakotombola maboko pe nakoloba nazali mosakoli ya lokuta.”

²⁶ “Pe soki Biblia elobi ete osengeli kozua libatisti na Nkombo na Yesu Klisto,” elingi koloba osengeli kosala yango bongo. Polo apesaki bango motindo ete babatistama lisusu. Ata babatistamaki ndenge nini, basengelaki koya, kobatistama lisusu. Babatistamaki na moto moko oyo abatisaki Yesu Klisto; Yoane Mobatisti. Alobaki: ‘Yango ekosimba lisusu te. Bosengeli koya, kobatistama lisusu.’ Pe basengelaki kosala yango, liboso ya kozua Molimo Mosantu. Ezalaki mwango na Nzambe.”

²⁷ Nakoki kokota na bozindo moke koleka na mpokwa oyo. Mpo na nini? Yesu abatelaka Liloba na Ye. Bondimi yango? Ee, pene na bino nyonso bozalaki awa na ntongo, kasi nalingi koloba moke koleka likolo na yango.

²⁸ Mpo na nini Polo apesaki etind- . . . apesaki motindo yango, sima na yango kosalema? Polo alobaki: “Soki Mwanje na Likolo ayei koteya eloko mosusu, tika alakelama mabe.”

²⁹ Sikawa, bokoloba: “Tozui Pole ya sika likolo na yango.” Te, bozui yango te. Na yango nde moyini ayaki epai na Ewa, Pole ya sika. Bozali na bosenga ya Pole ya sika te. Bozali na bosenga ya kotambola kati na Pole oyo Nzambe asili kopesa, awa, esili.

³⁰ Sikawa, botala malamau, ezali mpenza pete. Ntango bautaki na Ngomba ya Mbongwana, Yesu alobaki na bayekoli na Ye: “Bato bazali koloba ete Ngai Mwana na moto nazali nani?”

“Moto moko alobi ete Ozali ‘Mose, to Eliya, to moko na basakoli.’”

Alobi: “Bolobi Nazali nani?”

³¹ Alobi, Petelo alobi: “Yo ozali Klisto, Mwana na Nzambe na bomoi.”

³² Ye alobi: “Esengo na yo, Simona mwana na Yona, zambi mosuni pe makila emonisi yango na yo te.” Bomoni, yango eyaka na nzela ya likindo te. Eyaka na nzela ya bibongiseli te. “Mosuni pe makila emonisi yango na yo te. Oyekoli yango na kelasi ya likindo te. Kasi Tata na Ngai, oyo Azali na Likolo, nde Amonisi yango na yo. Pe likolo na libanga oyo, Nakotonga Lingomba na Ngai; pe bikuke na ewelo ekoki kolonga liboso na yango te,” emoniseli ya molimo ya Nani Ye azali.

³³ Botala, “Pe Ngai, Nalobi na yo ete ozali Petelo. Pe Nakopesa yo fungola na Bokonzi. Pe eloko nini okokanga na mokili,

Nakokanga yango na Likolo; eloko nini okofungola na mokili, Ngai nakofungola yango na Likolo.” Bongo, Ye asengelaki kobatela Liloba na Ye, to Azalaki Nzambe te. Ee, pe ntango Asalaki yango, sima na mikolo moke, Abakamaki na ekulusu, Asekwaki, Amataki na Likolo, pe Petelo afungolaki Nsango Malamu mokolo na Pentekote. Asalaki yango? Ye, ya solo, asalaki yango. Sikawa botala, ntango alingaki . . .

³⁴ Bato nyonso bazalaki kotiola bango, mpo ete batondisamaki na Molimo. Babengaki bango “Bapengwi, bantútuki,” to nkombo ya ndenge wana. Bazalaki pe koseka bango, pe koloba: “Basili kotonda na vinyo ya elengi.”

³⁵ Bongo Petelo atelemaki kati na bango, atombolaki mongongo pe alobaki: “Bandeko, boyoka mongongo na ngai. Boyoka maloba na ngai pe boyoka ngai. Bato oyo balangwe masanga te ndenge bozali kokanisa; oyo ezali bobele ngonga ya misato ya moi. Kasi oyo ezali nde makambo elobamaki na mosakoli Yoele ete, ‘Na mikolo na suka ekozala boye, ete Nakosopa Molimo na Ngai,’ pe yango nde Akosala na bana na Ye ya mibali, pe na bana na Ye ya basi, pe basali na Ye ya basi, pe nyonso, na eleko wana.”

³⁶ Pe ntango babandaki koyoka yango, bakatanaki mitema. Mpamba te, bayokaki moto oyo ayebaki ata ABC na ye te, kasi basengelaki koyoka ye, bayebaki azalaki na Eloko moko kati na ye, ezalaki kopela kati na ye, Molimo Mosantu. Kopekisa ye? Ee, ezali lokola komeka koboma móto na ndako ya mabaya, na mokolo ya mopepe makasi. Okokoka te. Atondisamaki na Molimo Mosantu. Pe asalaki nini?

³⁷ Balobaki: “Ee, bandeko, tosala nini mpo tobikisama?”

³⁸ Botia bokebi awa, Petelo, yo nde ozali na fungola na Bokonzi. Bomoni?

³⁹ Sikawa, ntango Yesu asekwaki mokolo ya misato, Azalaki na fungola na Bokonzi ya Likolo te. Boyebaki likambo yango? Alobaki: “Nazali na fungola na kufa pe na ewelo,” kasi oyo na Bokonzi te, mpo ete yango epesamaki na Petelo.

⁴⁰ Bongo, Alobaki: “Petelo, eloko nini okofungola na mokili, Nakofungola yango na Likolo. Eloko okokanga na mokili, Ngai nakokanga yango na Likolo.”

⁴¹ Sikawa, ye wana ateleme na fungola yango, mpo na kofungolela mokili eloko oyo epambolami. Pe ye wana na fungola na loboko. Pe bazali kotuna: “Tosala nini mpo tobikisama?” Sikawa, nyonso ntoma akoyebisa bango básala, Nzambe asengeli kondima yango na Likolo, soki Apesaki ye bokonzi yango.

⁴² Bongo, Petelo alobaki: “Bobongola mitema, moko moko na bino, pe bobatisama na Nkombo na Yesu Klisto mpo na kolimbisama na masumu na bino, pe bokozua likabo ya Molimo Mosantu.” Ezali solo? Pe yango wana, na Likolo, fungola

ebalukaki na nkombo mosusu te, ndenge mosusu te, lo—lolenge mosusu te. Efungolaki na mokili, pe efungolaki na Likolo, soki te, Yesu abatelaki Liloba na Ye epai na Petelo te. Pe bisika nyonso kati na Biblia, babatisamaki, sima na yango, babatisamaki na Nkombo ya Yesu Klisto. Pe bato babatisamaki liboso na yango, basengelaki kobatisama lisusu, na Nkombo ya Yesu Klisto, mpo na kozua Molimo Mosantu. Yango nde ya malamumu. Ezali bongo kino lelo.

⁴³ Bongo, soki tozali koteya libatishi na nkombo na “Tata, Mwana, pe Molimo Mosantu,” ezali esakweli ya lokuta. Sikawa, naboyi kobetisha bino libaku, kasi nasengeli kotalisa yango polele, mpo lingomba oyo bayeba likambo. Toyebi awa lokola etonga ya biléma pe ya baínga te, toyebi esika na biso kati na Liloba na Nzambe. Bomoni, toyebi. Nasengi na moto nyonso alingi atalisa ngai esika moto moko abatisama na nkombo ya “Tata, Mwana, Molimo Mosantu.” Sikawa, bokoyoka esakweli ya lokuta to Solo? Botala kati na Makomi. Ezali likambo na bino.

⁴⁴ Bólakisa ngai esika moto moko kati na Biblia, esika lingomba moko ekoma ebongiseli kati na—kati na Biblia. Bólakisa ngai kati na Biblia, esika bakomisa mwasi motei. Bólakisa ngai kati na Biblia, esika makambo oyo nyonso, tozali kolobela, esalema kati na Biblia. Ezali te. Bólakisa ngai esika moko. Bokende na ebongiseli. . .

⁴⁵ Ee, ntango ba-Methodiste bayaki, bateyaki kobulisama. Ezali malamumu. Kasi, ntango basalaki yango, bakomaki ebongiseli, pe ekataki likambo. Yango wana Biblia elobi: “Ozali na nkombo moko.”

Okoloba: “Nazali Moklisto.”

“Ee, ozali moto ya ebongiseli nini?”

⁴⁶ Okoloba: “Methodiste,” ee, ozali nde mwasi na pite. “Nazali Batiste.” Mwasi na pite. “Nazali Pentekotiste,” ozali mwasi na pite. Ozali moto ya lingomba wana.

⁴⁷ Osengeli nde kozala moto ya Klisto. Ezali na ntina te koloba “Methodiste,” “Batiste.” Soki ozali Moklisto, ozali Moklisto na motema.

⁴⁸ Moko na moko na bibongiseli wana ekoki kobota bana, bana na Nzambe, ya solo. Kasi soki okanisi ete okokende na Lola, bobele mpo ozali Methodiste to Batiste, ozali na libunga. Pe yango wana biso tozali libanda ya likambo yango.

Mpo na nini ba-Batiste bakoki komona te?

⁴⁹ Natunaki mobali moko ya Methodiste awa, akomaki makanisi na ye, akoma yango uta kala. Alobaki: “Likambo biso tozali kotelemela yo, okangami mingi na ba-Pentekotiste.”

Nalobaki: “‘Biso’ nde banani?”

“Biso ba-Methodiste.”

50 Nalobaki: “Ee, nakoyebisa nini nakosala. Nakoya na engumba na bino, pe bino ba-Metodiste bopesa mbongo mpo na yango.”

“Oh,” alobaki: “Na bosolo, tokokoka yango te.”

51 Nalobaki: “Yango nde nakanisaki. Natikali na ba-Pentekotiste, mpo ba-Pentekotiste bandimaka yango. Ezali solo. Bazali kosunga yango. Bango nde bazali kozua litómba na yango.”

52 Bato boni batangaki likambo yango na zulunale *Life*, mikolo eleki awa, na ntina na lingomba Pentekotiste? Ezali moko na makambo minene koleka na eleko oyo. Bazuaki bandimi ebele na mobu moko koleka mangomba nyonso mosusu elongo. Mpo na nini? Ata na mabunga na bango, Nzambe azali kokoba kokamba bango, mpo bandimi Solo pe bazali kokoba kotambola na Yango. Ezali Solo.

53 Kasi tozali kosala nini sikawa? Bomoni? Yango wana tina tozali ebongiseli te. Na ndenge moko ba-Pentekotiste bakóma ebongiseli. . .

54 Pe ntango eleki kuna, ntango Molimo Mosantu akitaki mbala ya liboso na lingomba Pentekotiste, eleki mibu ntuku minei, pe babandaki koloba minoko ya sika, moko na makabo. Yango ezali likabo ya moke koleka. Yango ezali likabo eleki moke, kokokana na Santu Polo, koloba minoko ya sika. Pe bobele ntango ekitaki, “Oh,” balobi: “tozui Yango sikawa,” pe basali ebongiseli, Lisanga Monene, oyo ekómi sikawa ba-Assemblée de Dieu. “Oh, moto moko te azali na Yango, bobele soki alobi minoko ya sika,” pe Nzambe atangwi mosika na bango mbala moko, pe Atiki bango wana. Ya solo. Iyo, misie.

55 Na sima ba-Unitaire bayaki, pe bamonaki libatizi na Nkombo na Yesu. Balobaki: “Oh, tozui Yango,” bamibongisaki. Basalaki nini? Nzambe abimaki mbala moko pe atiki bango wana.

Ezali mpo na “Moto oyo alingi, aya.”

56 Bomoni, ba-Unitaire bakoki kokende epai na ba-Assemblée te. Ba-Assemblée bakoki kokende epai na ba-Unitaire te. Nasololaki na bato mosusu ya malamú mpenza kati na bango, Misie Goss, ná Dokta Pope, ná bamosusu mingi. Bato oyo bazali bato minene kati na . . . Nafandaki na bango. Nalobaki: “Ndenge nini okoki koteya yango elembo ya liboso, yo moto na maye?”

57 “Ee,” alobaki, “Ndeko Branham,” moko, mibale, to misato kati na bango, bazalaki mpenza sembo, balobaki, “toyebi ete ezali libunga, kasi tosala boni? Soki tolobelí yango sikawa, ee, ekobebisa manaka mobimba.” Ya solo, pe okozala lisusu eveke te, to moyangeli mokonzi te. Likambo nde yango wana.

58 Ndeko, nakosepela mingi kozala na losambo ya moke na suka ya nzela, to koteya na nse ya nzete ya wenge, pe kozala na Solo,

na ntembe te, pe koyeba ete ozali koloba Solo. Moto alingaka Solo. Pe lokola Moklisto, osengeli kotatola mpo na Solo. Nzambe akotia mokumba yango likolo na yo.

⁵⁹ Bongo, mpo na makambo oyo, soki obatisama na Nkombo na Yesu Klisto te, pe osalá makambo yango te, pe ozuá Molimo Mosantu te. . .

⁶⁰ Okoloba: “Oh, ngai nalobaka minoko na sika.” Yango elingi koloba te ete ozali na Molimo Mosantu.

⁶¹ Ngai nasilá komona bandoki ya basi, bandoki ya mibali, milimo mabe, pe nyonso mosusu, koloba minoko na sika. Ya solo. Bazali na Molimo Mosantu te, pe boyebi yango. Komela makila na mokuwa ya motó ya moto, pe kobina, pe kobelela zaboló, pe koloba minoko na sika. Ya solo. Bazali na Molimo Mosantu te.

⁶² Bongo, mpo olobi minoko na sika, elingi koloba te ete ozali na Ye. Lolenge bobele moko okoki koyeba ozali na Ye, ezali ntango molimo na yo ezali kotatola mpo na Molimo na Ye, pe mbuma na Molimo ezali kolanda yo: bolingo, kondima, esengo, kimia, kokanga motema, boboto, bolamu, bopolo. Na ntango wana nde okoyeba ete ozali na Molimo Mosantu. Ye azali kotatola mpo na Ye moko.

⁶³ Sikawa, ntango ozali komeka kotia motema, bobele mpo ozali moto ya Assemblées, to Batiste, to Presbyterien, omoni, ozali kosala nini? Ozali kozua nkombo ya mwasi na pite. Ezali mpenza solo. Bima na likambo wana. Kima mosika na yango. Nalobi te obima na lingomba na yo to eloko mosusu; sala na yo eloko olingi kosala. Kasi kima mosika na kotia motema na: “Oh, ngai nazali Presbyterien. Bisó, tondimaka mikolo na bikamwa te.” Mpo na nini ondimaka yango te? Biblia ezali koteya yango. “Oh, ngai nazali moto ya Lingomba ya Klisto. Bango balobaka mikolo na bikamwa esila koleka.” Bazali basakoli ya lokuta.

⁶⁴ Nakoki kolakisa yo esika Yesu Klisto apesaki Lingomba Nguya, mpo na kobikisa babeli, pe kosekwisa bakufi, pe kobengana milimo mabe. Nasengi na moto nyonso alingi ete alakisa ngai Likomi moko kati na Biblia esika Alongola yango na Lingomba. Eloko nini elongola yango? Biyambweli na bino moko, ya solo, Liloba na Nzambe te. Molimo Mosantu azali kokoba kosala mosala, kokoba ndenge moko, pe Akosala yango ntango nyonso.

⁶⁵ Yango wana tozali ebongiseli te: “Bazali na lolenge ya kosambela, nde bazali koangana Nguya na yango; yo kima bato ya ndenge wana.” Bisó tondimaka makambo wana te.

⁶⁶ Sikawa, yango ebandaki ndenge nini? Tosengeli kosala noki, mpo tolobela yango na lombangu sikawa, ndenge nini ebandaki. Sikawa, tozali na biteni ya Makomi ebele ekomami awa, mpo na Molimo Mosantu.

⁶⁷ Pe likambo mosusu, tobetaki mondéngé lobi na mpokwa, likolo na: “moléndé ya basantu,” lolenge ba-Batiste bandimaka yango te. Te, misie. Ya solo nakeseni na ba-Batiste, pe makanisi na bango, mateya na bango ya Calvinizme. Nandimaka mpenza ndenge moko te na ba-Presbiterien. Nandimaka ndenge moko te na ba-Methodiste likolo na mateya ya ba-Armenien. Iyo, misie. Kasi bango nyonso mibale bazali na solo, kasi osengeli komema yango *Awa*, epai Solo ezali. Soki okei na ngambo wana, okei pembeni. Ya solo.

⁶⁸ Ba-Batiste bayaki, babatise bato awa, na kozindisa na mai; pe motei abatisaki bango, bato libwa likolo na zomi bamelaka makaya; babimaka, bakendaka kuna pe babetaka kalati, pe lóto butu mobimba, babimaka na bango, be basalaka mimbongo ezangi bosembo; pe basi nyonso awa balataka bakupé, batámbolaka-tambolaka na ba-nzela, pe bakataka suki na bango, pe—pe bamelaka makaya pe kolobaloba, pe basalaka lipati moke moke ya kosona bilamba, pe kobeta masolo ya bosoto. Pe yango nde bobengaka Boklisto? Pe bokanisi bozali na kobatelema ya Seko? Bokokende na lifelo lolenge wana. Bokosepela na Lola na lolenge wana te. Ata moke te. Yango nde kobatelama ya Seko te.

Kasi soki moto abotami lisusu na Molimo Mosantu . . .

⁶⁹ Pe bino, ba-Pentekotiste, mpo bopumbwaka likolo, bolobaka minoko na sika, pe bokimaka mbangu kati na losambo, yango elobi te ete bozali na kobatelama ya Seko. Botia yango na motó na bino te. Te, misie. Ezali bongo ata moke te. Mpamba te, oyebi ete bomoi na yo—na yo moko ezali kotalisa yo polele, kotatola ete obongi te liboso na Nzambe. Ya solo. Obongi te. Yango ezali ata kobatelama ya Seko te,

⁷⁰ Kasi nalingi kotuna bino likambo moko. Kobatelama ya Seko ezalaka? Biblia elobi bongo. Biblia elobi bakombo na biso ekomamaki kati na Búku na Bomoi ya Mwana na mpate liboso na kozalisama na mokili.

⁷¹ Ndenge nalobaki na ntongo ya lelo, nazali koloba yango lisusu. Mobali oyo akomaki loyembo oyo: “Nkombo moko ya sika ekomami kati na Nkembo na mpokwa oyo, pe ezali nde nkombo na ngai,” likanisi na ye ezalaki malamu, kasi azalaki na libunga, kokokana na Makomi. Nkombo na yo ekomamaki te na mpokwa oyo obikisamaki.

⁷² Nkombo na yo, kokokana na Biblia, kokokana na Emoniseli 13, 17 pe bongo na bongo, “ekomamaki kuna liboso ya kozalisama ya mokili; pe Yesu Klisto abomamaki liboso na kozalisama ya mokili.”

⁷³ Ndenge nini Nzambe, Oyo azangi suka; ndenge nini Nzambe oyo azangi suka, Oyo ayebi suka longwa na ebandeli, ndenge nini Akokaki kopesa nzela ete lisumu éya na mokili, soki ezalaki na ntina moko te?

⁷⁴ Sikawa, mpo na kotia moboko likolo na makambo tolobaki. Nani azalaki liboso, Mobikisi to mosumuki? [Moto moko kati na losambo alobi: “Mobikisi.”—N.D.E.] Mobikisi, ya solo. Nani aleki na nguya, Mobikisi to mosumuki? Soki Mobikisi akoki kolongola lisumu, Ye nde aleki na nguya. Malamu, mpo na nini Atikaki ete lisumu éya liboso? Mpo na kotalisa ete Azalaki Mobikisi. Nani aleki na nguya, monganga to bokono? [“Monganga.”] Monganga. Bongo mpo na nini Atikaki bokono éya? Mpo na kotalisa Azalaki monganga. Namiyoki mosambeli sikawa. Iyo, misie. Olála! Yango ezali misala na Ye.

⁷⁵ Yango wana Atikaka bolozu koya. Yango wana Atikaka mawa koya, mpo na kotalisa ete Azali esengo. Ezali ya solo. Yango wana tozali na butu, mpo na kotalisa ete moi ezali. Yango wana tozali na nkanda, mpo na kotalisa ete kimia ezali. Ya solo, malamumu na mabe ezali. Oh, Azali malamumu mingi.

⁷⁶ Sikawa, ebandaki ndenge nini? Tokolobela yango sikawa, na lombango mpenza, mpo nákanga bino butu mobimba awa te. Sikawa, esengeli ete ebandeli ézala mpo na makambo nyonso.

⁷⁷ Pe nalingi kotuna bino likambo moko. Sikawa, yango ekoki . . . Bokoki kokotisa yango na mabenga na bino ya kazaka. Bosengeli te kobakisa yango na bilei ya momesano. Kasi bóyoka yango.

⁷⁸ Soki ozali ekelamu ya Seko, na bongo, ozali na yo na ebandeli te, to okoki na yo kozala na suka te. Mpamba te, *Seko* euti na liloba oyo “oyo azali na ebandeli te pe na suka te.”

⁷⁹ Bomikaniselaka yango, boye te? Nalobaki, na ntango ya lelo, likolo ya Melekisedeke, ntango akutanaki na Abalayama oyo autaki koboma bakonzi. Pe Biblia elobi, na Baebale 7, ete—ete “Lewi akabaki moko na zomi epai na Melekisedeke, ntango azalaki na loketo ya tata na ye Abalayama.” Abalayama abotaki Yisaka; Yisaka abotaki Yakobo; Yakobo abotaki Lewi. Elingi koloba tata, tata-nkoko, pe nkoko ya tata-nkoko. Pe ntango Lewi azalaki na loketo ya nkoko na ye, Biblia etangeli ye litómba ete akabaki moko na zomi epai na Melekisedeke. Tozali koloba mpo na Seko, bofanda! Olála! Alobaki te ete “Asalaki yango lokola elilingi, asalaki yango mpenza.” Biblia elobi: “Afutaki moko na zomi.” Amen.

⁸⁰ Bongo, soki touti na momboto ya malamumu, ntango Polo ateyaki Nsango Malamumu, nazalaki wana, yo pe ozalaki wana. Tokokota na yango, sima na ntango moke, na bozindo mpenza. Botala, yango nde Makomi elobi na biso, kozongisa na oyo eleka.

⁸¹ Bokanisa naino! Lewi; na sima Yakobo, tata na ye; na sima Yisaka, tata na ye; na sima Abalayama, tata na ye; nkoko na nkoko na ye. Ntango Lewi azalaki na loketo ya nkoko na nkoko na ye, afutaki moko na zomi epai na Melekisedeke.

⁸² Nalingi kotuna bino. Balobeli nani awa, na Yobo 27 . . . 38, ntango Alobaki: “Ozalaki wapi ntango natiaki miboko ya

mokili? Ntango minzoto na ntongo ezalaki koyemba elongo, pe bana na Nzambe bazalaki koganga na esengo?” Banani yango bana na Nzambe oyo bazalaki koganga na esengo? Yesu alobaki na bango ete “Nazalaki kosepela elongo na bino liboso na kozalisama ya mokili.” Bisó tozali bikelamu ya ntango te. Tozali bikakamu ya Seko na seko.

⁸³ “Moto moko te akoki koya epai na Ngai, soki Tata na Ngai abendi ye te. Pe baoyo nyonso bakoya epai na Ngai, Nakopesa bango Bomoí na Seko, pe Nakosekwisa bango na mikolo ya suka. Moto moko te akoki kobotola bango na loboko ya Tata na Ngai, Oyo apesi Ngai bango.” Okobunga ndenge nini?

⁸⁴ Bomoni, bozali kobanga. Bozali na nsomo. Bokokima zinga zinga awa. Pe yango ezali moko na bitaliselo ya malamú koleka, na mokili, ete bokómi naino mosika te. Ya solo. Ndenge nini Nzambe akoki kobikisa yo, soki Ye. . .

⁸⁵ Bato boni na losambo oyo bakoki kotombola maboko, pe kondima ete Nzambe azangi suka? Boyebi nini *kozanga suka* elingi koloba? Ezali kobonga be. Kozanga suka, okoki te—okoki te kolimbola liloba oyo *kozanga suka*.

⁸⁶ Bomekà kosalela ekangelo fotó pe kotala esika ezangi suka? Ee, ekotalisa nyonso ezali na sima. Malamú. Lolenge ya kososólo koleka yango ezali te.

⁸⁷ Ee, bongo nde Nzambe azali. Azangi suka. Pe soki Azangi suka, likélele moko te, nzinzi moko te, nsili moko te, kinsekwa moko te, liyanzi moko te, to eloko moko te awa na mokili ezali, to ekozala, oyo Nzambe ayebaki yango te liboso mokili esalema. Wana nde likanisi moke ya kozanga suka.

⁸⁸ Ee, bongo Nzambe azangi suka, Oyo abikisi yo sikawa, pe Ayebi akobungisa yo na póso ekoya, to na sanza ekoya, to mbula ekoya, ee, Akotelemela ntina yango mpenza. Akoki kobungisa yo te. “Moto nani akoyoka Maloba na Ngai pe akondima Ye oyo atindi Ngai, azali na Bomoí ya seko pe akokóma na esambiseli te, kasi asili kolongwa na kufa pe koingela na Bomoí.” Ekoki kosalema te. Okoki lisusu te. . .

⁸⁹ “Ye oyo abotami na Nzambe asalaka masumu te; mpo ete momboto na Nzambe ekoumelaka kati na ye, pe akoki kosala masumu te.” Ndenge nini akoki kosala masumu, wana mbeka ya masumu ezali kuna mpo na ye?

⁹⁰ Ndenge nini nakoki kozala na bokono, wana nazali na nzoto kolongonu? Ndenge nini nakoki kokufa miso, wana nazali komona? Hólála! Ndenge nini nakoki kozala kati na ndako pe libanda na ndako na ntango moko? Ndenge nini nakoki kozala na molángwa pe kozanga molángwa na ntango moko? Ekoki kosalema te.

⁹¹ Pe ntango obikisami, ozali na nse ya Kosikolama, pe masumu na yo ekotangama mpo na yo te. Dawidi alobaki te ete, “Esengo

na moto oyo Nzambe atangaka masumu na ye te, pe atangelaka ye masumu te.”? Nzambe atangelaka ekelamu na Ye masumu te. Ezali likambo makasi. Ezali miliki ya bana mike te. Kasi ezali Biblia. Nzambe akotangela moyengebeni masumu na ye te.

⁹² “Nzambe,” na ngolu na Ye, na nzela na koponama liboso, “Alingi bato babunga te kasi alingi bato nyonso babongola mitema.” Kasi lokola azangi suka, pe ayebi nani akoya ná oyo akoya te, Abongisaki makambo nyonso étambola yengebene na mokano na Ye. Soki Asalaki yango te, mpo na nini Apesaki lisumu nzela? Ezalaki Ye Mobikisi . . . Soki mosumuki azalaka te, Alingaki kozala Mobikisi soki moke te; mosala, oyo ezalaki kati na Ye, elingaki komonisama te.

⁹³ Ndenge nini Akómaki mobikisi na bokono? Ndenge nini Akómaki mobikisi na bokono? Ezali mpo Apesaki bokono nzela, mpo Akoka komitalisa lokola mobikisi na bokono. Azalaki Mobikisi na bokono. Ndenge nini okoki ko . . . Ndenge nini Akokaki koyebana? Ndenge nini mosala na Ye ekokaki komonisama? Ndenge nini akokaki kozala mobikisi na bokono, soki bokono ezalaki te? Esengelaki Apesa bokono nzela.

⁹⁴ Ezali kokamwa te, Polo alobaki na Baloma 8: “Moto zoba, nani akoki koyebisa mo—moyemi mbeki eloko nini asengeli kosala; nani, ntango mabele na mbeki eteleme pe ebandi koloba: ‘Mpo na nini yo, osali ngai boye?’ Ye atemisaki Falo te mpo na ntina wana, mpo Akoka kolakisa nkembo na Ye na Ezipito? Ayeisaka motema makasi na moto Ye alingi, pe Alongisaka moto Ye alingi. Ezali te likambo ya moto alingi to azali kopota mbangu, kasi Nzambe nde azali na motema mawa.”

⁹⁵ Bongo, yo ozali na likambo na kati te. Ozali na likambo ya kosala te. Soki ezali ngolu, soki ezali likabo ya ofelé, likambo moko yo okoki kosala mpo na yango ezali te. Nzambe apesi yo yango, pe ezali mokano na Nzambe. Yango nde likambo Nzambe akanaki liboso mpo na yo.

⁹⁶ Biblia elobi ete “toponamaki liboso mpo tozala bana ya lokumu, bana na Nzambe, liboso na kozalisama ya mokili.” Bongo, ntango Nzambe abomaki Mwana na mpate, kati na makanisi na Ye Moko, liboso na kozalisama ya mokili, mpo na kotalisa polele misala na Ye, oyo Ye azalaki; ntango Mwana na mpate abomamaki, biso tobomamaki elongo na Ye. Ntango Makila ya Mwana na mpate ezuamaki, kati na makanisi na Ye Moko, kalakala liboso mokili ezalisama, nkombo ya ngai na yo ekomamaki na Búku ntango wana, nyonso na makanisi na Ye monene.

⁹⁷ Ye azangi suka. Soki te, Apesaki yango nzela mpo na nini? Nani aleki na makasi, (ndenge nalobaki,) Mobikisi to mosumuki? Nani azali na makasi koleka? Bongo, esengelaki na oyo aleki makasi apesa nzela na oyo aleki pete, pe Asalaka yango bobele mpo na nkembo na Ye. Ntango asalaki Lusifele,

Ayebaki ete akozala zabolo. Esengelaki Atika yango wana, mpo na kotalisa ete Azalaki Mobikisi, Klisto. Asengelaki kotika makambo esalema bongo.

⁹⁸ Sikawa, Biblia elobi te ete “Makambo nyonso epesanaka maboko mpo na bolamu na baoyo balingaka Nzambe.”? [Losambo balobi: “Amen.”—N.D.E.] Bongo, bozali kobanga nini?

Totelema, pe tosala mosala,
Na motema moko, mpo na kobunda.
Tozala lokola bibwele ya zoba te, oyo basengeli
kobondelaka, pe kondimisaka!
Kasi tozala bilombe!

⁹⁹ Nalingaka yango. Telema! Loyembo moke oyo ezalaki kosunga ngai mingi ntango nazalaki mwana, ezali koloba lokola boye.

Moto ya Roma ya lokumu azalaki,
Na mikolo ya Mokonzi ya Roma;
Ayokaki mongongo ya eyanganga,
Liboso na ndako ya mokonzi koloba:
“Oh, nabatelami likolo na nzete oyo,
Moto te akoki koningisa yango.”
“Oh, te,” elombe alobaki,
“Nakokoka, to nakosala yango.”

¹⁰⁰ Bomoni. Ezali bongo. Soki Biblia oyo elakisi ete Yesu Klisto azali ndenge moko lobi, lelo pe libela . . . Ezalaki likambo moke te ntango nabimaki na losambo mokolo wana, pe bato nyonso bazalaki koyebisa ngai ete likambo *boye* ekosalema, pe likambo *oyo* ekosalema. “Bato bakozua yo lokola bilanda-landa, bakobwaka yo na boloko, pe lisanga nyonso ya minganga bakotelemela yo.” Kasi Nzambe alobaki násala yango. Biblia elobi Azalaki bongo. Pe sikawa, móto ya kolamuka ezali kopela na ekólo nyonso na nse ya Moi. Mpo na nini? Botelema wana!

Ndenge nini osalaka mosala mokolo na mokolo?
Obangaka mosala ezali kozela yo?
Ozali na molende mpo mosala ekoba?
Makanisi na yo ezali pamba pe elembi? (Naboyi makambo ya boye.)
To ozali na moléndé mpo mosala ekoba?
To otondi bebele na nsomo?
Soki bongo, sála mosala oyo elandi,
Na kondima ete okosala yango.

¹⁰¹ Telema ngwi. Ya solo. Zua mokano na motema na yo, lokola Daniele. Kangama na Nzambe.

¹⁰² “Makambo nyonso oyo esalemaki wapi? Esalemaki ndenge nini? Eloko nini ekomisaka bato boye? Mpo na nini tokómi

pene tobebisama? Ndeko Branham, limbolela ngai. Eloko nini endimisi yo ete biloko nyonso oyo ekobebisama?” Ebebisama mbala moko (boye te?) na kobebisama ya mpela monene. Awa tokómi na likambo ya bozindo. Pe tokomilengela mpo na kotanga.

¹⁰³ Sikawa, nalingi bozua elongo na ngai, awa, na Búku ya Genese, mokapo ya 3. Soki olingi koyeba likambo, nakoki kolakisa yo na Búku ya Genese, esika kosambela nyonso pe makanisi nyonso, pe makambo nyonso tozali na yango lelo, ebandaki na Genese. Bato boni bayebi ete *Genese* elingi koloba “ebandeli”? Ya solo.

¹⁰⁴ Tomoni lingomba Katoliko na ebandeli, Babilone, Nimrode, mobandisi; tomoni yango na katikati ya Biblia, tomoni yango na suka ya Biblia; tomoni, bameki kokomisa basi batei na ebandeli ya Biblia, na kosambelaka bikeko ya mike esalemi na misísa ya nzete. Bato boni batángá búku ya masolo, *Babilone Mibale* ya Hislop? Malamu. Botala tala yango, na buku ya masolo wana. Bazalaki na mwasi moko. . . Pe lisusu, bomikanisela, Yakobo ayibaki banzambe ya tata na ye, pe mwana na ye ya mwasi abombaki yango na nse pe amemaki yango kuna na biliki, yango eyeisaki mbindo na molako, na sima. Malamu.

¹⁰⁵ Sikawa tótanga awa na Genese.

Nyoka alekaki nyama nyonso na mokili na mayele mabe, oyo Yawe Nzambe asilaki kozalisa. Alobaki na mwasi ete, Nzambe alobaki solo ete bino bokoki kolia mbuma na nzete nyonso na elanga te?

. . .mwasi azongiselaki nyoka ete, Tokoki kolia mbuma na nzete na elanga.

Kasi mpo na mbuma na nzete oyo. . .na katikati na elanga, Nzambe alobi ete, Bino bokolia yango te, pe bino bokomama yango te ete bino bokufa te.

Nyoka alobaki na mwasi ete, Bino bokokufa solo te,

Mpo ete Nzambe ayebi mpenza ete na mokolo oyo bino bokolia yango, miso na bino ekofungwama, (bomoni, bazali koluka Pole ya sika), pe bino bokozala pelamoko na Nzambe, koyeba malamau pe mabe.

¹⁰⁶ Bomoni ndenge bato yango bazali lelo, komeka kolongola makambo na Biblia? “Bongo, kosopa mai, to komwangisa mai, lolenge boye, to lolenge mosusu, ezali ndenge moko te?” Te, misie. Nzambe azali na mwango moko, yango nde tosengeli kolanda, *Yango*.

Emonaki mwasi ete nzete ezalaki malamau na kolia, pe kitoko na liso, pe ete nzete yango ezalaki kozipola. . . ezalaki malamau mpo na kozipola bososoli na moto, akamataki mbuma yango pe aliaki, apesaki pe mobali ye oyo azalaki elongo na ye, ye pe aliaki.

*Pe miso na bango nyonso mibale efungwanaki,
pe bayebaki. . . bazali bolumbu. Basonaki nkasa na
mosuke, pe basalaki nkamba na kolata.*

¹⁰⁷ Nalingi kotelema awa miniti moke. Sikawa, esengeli ebandeli ézala mpo na makambo nyonso. Bozalaki na ebandeli. Sikawa biso. . . Botala esika nalingi sikawa kotia mobóko na makambo nyonso tolobelaki, na mayangani mibale ya suka kino sikawa.

¹⁰⁸ Sikawa, na ntongo ya lelo, tozongaki sima mpo na komitalisela polele, kati na Biblia, ntango Nzambe azalaki kosala mokili, ntango Asalaki ba-gázi; na sima ba-gázi yango ekómaki kalsium, pe potase, pe—pe biloko mosusu. Azalaki kosala nzoto na yo. Azalaki kotonga ndako, lokola motóngi monene ya bandako, lokola motóngi ndako abongisaka bisaleli na ye mpo na kotonga ba-ndako. Azalaki kosala nzoto na yo, pe Atiaki yango wana. Ayebaki malamumu mpenza, na makanisi na Ye, eloko nini ekosalema.

¹⁰⁹ Loboko oyo, Nzambe asalaki loboko oyo liboso na Ye. . . ntango Azalaki kosala mokili; kasi, molimo na ngai, Asalaki yango liboso mokili ézala. Ee, kasi loboko oyo ná nzoto oyo, Asalaki yango ntango Asalaki mokili, mpo ete nzoto oyo eutaki na mabele, pe ekozonga na mabele. Nzambe asalaki yango. Alengelaki nyonso wana kati na mokano na Ye monene pe mwango na Ye.

¹¹⁰ Sikawa, ntango Abandaki kosala mabele, Asalaki moto, pe moto azalaki mpenza na lolenge malamumu te. Bongo, tolobelaki yango, na ntongo ya lelo, totalisaki yango, nde—ndenge Tata akitaki pe atalaki mwana na Ye, oyo asalemaki na elilingi na Ye, pe bongo na bongo. Na sima Asalelaki ye mwasi, mosungi.

¹¹¹ Sikawa, bobosana te, ete, bikelamu nyonso ya mokili Adama nde apesaki yango nkombo.

¹¹² Asalaki bi—bibwele, banyama, pe biloko nyonso. Pe lelo, biso. . . Baluki-luki, ná—ná bato minene mingi ya zebi, bazali komeka, lelo mibu nkoto motoba, koluka eloko ezangi, nyama wana. . . Moto azali na bomoi ya nyama. Toyebi yango, ete tosalema. . .

¹¹³ Pe mwasi azali bobele eteni ya mobali, eloko euti na ye. Mwasi azalaki na kozalisama ya ebandeli te. Nzambe asilisaki mosala ya kozalisa, koleka mibu ebele, ebele, ebele, kino ntango Ayaki kosala mwasi uta na mokuwa eutaki na mopanzi ya mobali. Adama apesaki nkombo na bikelamu nyonso, pe nyonso mosusu, kasi azalaki na eloko te mpo na ye moko. Bongo, Asalelaki ye mosungi; Akamataki mokuwa uta na mopanzi na ye, Azipaki póta yango, pe Asalelaki ye mosungi. Pe mobali, kati na molimo na ye, azalaki mobali pe mwasi.

114 Pe mwasi azali bobele eteni ya mobali. Pe ntango mobali abali mwasi, pe soki azali mpenza mwasi na ye, mwasi oyo Nzambe apesi ye, akozala epai na ye lokola eteni na ye.

115 Tala ntina bozali na mindondo mingi kati na mabala, ezali ete yo obimi pe omoni elenge mwasi moko ya miso kitoko ya sokolá, to miso ya bulé, to eloko ya ndenge wana, kitoko ya elongi, pe olingi ye mpo na yango. Ntango akobota mwana na ye ya liboso, mino na ye ebukani, pe abandi konuna pe kokóma mobange, ntango wana olingi kobwaka ye libanda. Pe bino basi mosusu bokutani na elenge mobali ya suki petepete, oyo apakoli pomade ya suki ya mama na ye, elingami-lingami. Yango nyonso wana ekokwea; nayebi likambo nazali koloba. Bongo, nini ekosalema? Ezali nini? Olingi ye mpo na yango.

116 Esengeli na bino kobondela liboso, mpo mwasi azali eteni na yo. Pe soki okangani na mwasi na ntólo na yo, pe oye bani na ye lokola mwasi na yo, pe yo . . . Akotika elembo likolo na yo. Tóloba yango bongo mpo bokoka kososola. Pe mwasi mosusu nyonso likolo na ntólo wana, akokokana na elembo yango te. Pe Nzambe akotangela yo yango. Pe bino moko bokanisa yango.

117 Yo moto obimaka na mwasi ya moto mosusu pe . . . Lelo nayokaki lisolo ya elenge mwasi moko na engumba, elenge mwasi ya bato. Nayebi ye. Mobeti masano ya mbongo asombelaki ye bilamba mingi ya kitoko, pe bongo, pe abandaki kokosa bongo. Mokosi, moto asalaka likambo ya boye, akoki kotiama na molongo ya bato te.

118 Boyebi, mbwa akoki kosala makambo ya nsoni boye te, pe bozali kobenga mama ya mbwa “ndumba.” Azali na lobiko malamumu koleka ndambo ya basi ya Jeffersonville. Pe bozali kobenga mama ya ngulu “pite,” pe azali te na . . . Azali na lobiko malamumu mingi koleka basi ya Etats-Unis, mingi kati na bango. Ezali mpenza solo. Sikawa nayebi ezali makasi. Nayebisaki bino nakobeta nsete makasi, pe nalingi boyeba yango. Pe ezali solo. Bango nyonso, basi ya lelo, bayebi te nini yango lobiko malamumu. Balobaka: “Etungisi lisosoli na ngai te.” Ee, ozali na yo na yango te. Tala. Iyo, misie. Bongo, oyebi malamumu ná mabe.

119 Sikawa botala. Mobali oyo, ntango asalemaki, Nzambe akabolaki molimo na ye. Pe Azuaki eteni moko ya mobali, mopanzi na ye, pe Asalaki na yango mwasi. Na sima, Azuaki bomwasi, molimo moke oyo mobali azalaki na yango, pe Asalaki na yango mwasi. Bongo mobali, Asalaki ye mobali mpenza, engambe.

120 Pe ntango omoni mo—mo—mobali oyo azali moke . . . boyebi, abongisaka maboko na ye, to bobengaka yango nini, manzaka na ye; pe, boyebi, minei na ngambo moko pe mitano na ngambo mosusu, pe—pe akómisi suki na ye petepete; afungolaka monoko polele, ná makambo ya ndenge wana, moko na bilenge mibali kitoko. Ndeko mwasi, kobosana te, eloko moko ezali malamumu te

na moto wana. Eloko moko ezali malamumu te. Ekozala malamumu ete okeba na ye.

¹²¹ Pe ntango omoni elenge mwasi na likaya na monoko na ye, alati salopette, pe azali koloba: “Mobali, ngai nakoyebisa yo likambo!” Ndeko mobali, keba na elenge mwasi wana. Eloko moko ezali malamumu te kati na ye.

¹²² Mwasi asengeli kozala mwasi, pe asengeli kolata lokola mwasi. Ntango Nzambe asalaki mobali, Asalaki ye na lolenge moko; Asalaki pe mwasi na lolenge mosusu. Pe ntango Nzambe alatisaki mobali, Alatisaki ye na lolenge moko, pe mwasi na lolenge mosusu. Pe Biblia elobi: “Ezali mbindo mpo na mwasi kolata elamba ya mobali.”

¹²³ Pe bino basi, oyo bozali kolata bapatalo ya mike wana, pe nyonso, pe kolata yango libanda, ya mike wana . . . Bobengaka yango nini, bapatalo ya mikuse? Babengaka yango . . . ? Oh, eloko bango ba . . . ? Te, te, ezali bakupé te, ezali nde mosusu wana, ezalaka na makolo milai wana. [Losambo balobi: “Bapatalo mike mike ekangaka nzoto.”—NDE] Bapatalo mike mike oyo ekangaka nzoto, ná ba-solopette, bilamba ya mosala.

Soki okoti, bakoloba: “Oyo mpo na bamama.”

¹²⁴ Nalobaki: “Te, bozali na libunga. Bamama balataka bilamba wana te. Basi bakoki, kasi bamama te.” Ezali solo.

¹²⁵ Biblia elobi: “Ezali mbindo mpo na mwasi kolata elamba ya mobali; pe mpo na mobali kolata elamba ya mwasi.”

¹²⁶ Pe mokolo na mokolo, mibali bazali kokóma koleka lokola basi, pe basi bazali kokóma koleka lokola mibali. Likambo nini? Tokomona yango nsima na miniti moke, na Biblia. Basi bazali lisusu basi te. Nalobi mpo na bino te, basi Baklisto. Nalobeli bobele basi na mobimba. Balingi kozala lokola mibali; balingi kokata suki lokola mibali; kotombola loboko *boye*, na mesa ya masanga pe koyemba *Nzambe Apambola Amerika*, ná likaya na monoko.

¹²⁷ Bazali kotambola na balabala, kozonga sima boye, katikati ya balabala monene. Totangaki . . . Nalingi koloba likambo moko. Pe bino, basi bokumbaka mituka, boyoka. Ngai na Billy Paul, na mobembo na ngai ya suka kopalanganisa Nsango Malamumu, na senza motoba kotambola kati na ekólo, natangaki makama esalemaki na nzela. Kati na mbeba nkama misato esalemaki na nzela, bokanisa boni kati na yango esalemaki na basi bakumbi mituka? Ezangaki bobele . . . Zomi na libwa na yango esalemaki na mibali. Nkama mibale na ntuku mwambe, to nakanisi, nkama mibale na ntuku libwa na moko, esalemaki na basi bakumbaka mituka. Basi bakumbi mituka! Sikawa, nalobi te ete basi bakumbi mituka ya malamumu bazali te. Kasi akobalusa motuka na ngambo nyonso.

128 Pe yo meka kokanga ye na mbeba? Soki azali kitoko na elongi, atele mi wana, abongisi suki na ye, ntango polisi akoya. “Kasi,” akoloba, “ya solo, yo nde ozali na libunga!” Tozali na mobeko te.

129 Batalisaki yango mokolo wana na kolandela ngai na likambo ya mpako nauti koleka na yango awa. Tozali na mibeko te. Soki ezalaki . . .

130 Ezali kokamwa te ete bazúzi-bakonzi ya Angleterre balobaki, “Demokrasi ezali masúwa etámbolaka kasi ezangi lóngo.” Ezali solo, batelemi likolo na sanduku ya sabuni, kolobela boponami. Demokrasi ebebi, ná bakonzi ya nko lokola, ná nyonso mosusu. Nyonso wana ebebi. Mpo na Nzambe, likambo ya kosala etikali bobele moko, ezali koboma yango nyonso, ndenge Alobaki Akosala, pe Akobandela ya sika. Sikawa, botala boni bobele mi na Boyei.

131 Bongo, ntango mwasi oyo . . . Asalelaki ye mosungi, pe mwasi asengelaki kozala mosungi na ye. Na sima . . .

132 Sikawa, awa, kino lelo naino motei moko te ayokana na ngai likolo na yango. Pe bamekaka koloba yango na ndenge mosusu, kasi mpo na ngai esimbaka te. Bamekaka koloba ete Adama na Ewa baliáká mbuma. Ndeko, soki . . . Nazali koloba yango mpo na maseki te, ee, kasi nakoloba yango. Mpamba te, soki kolia mbuma, ekoki kosunga basi koyeba ete bazali bolumbu, ekozala malamu tokabola mbuma yango lisusu. Pe boyebi ezali solo.

133 Boyebi, kolia mbuma, ezali likambo basalaki te, yango esalaki báyeba ete bazalaki bolumbu. Ya solo, ezalaki yango te. Esengelaki kouta na koyebana nzoto. Esengelaki, mpo báyebaki bazali bolumbu ntango baliaki mbuma oyo bapekisaki bango. Mwasi azali nzete ya mbuma, boye te? Ozali mbuma ya mama na yo, boye te? Yango nde Mbuma bapekisaki bango kolia yango.

134 Sikawa, oyo ezali likambo monene. Sikawa, eloko ebelemi koleka oyo zebi ezali na yango mpo na koyeba ndenge moto azalaki . . . Batimolaka mikuwa ya kala, bazuaka biloko ya kala, bazuaka mitó, pe mikuwa ya motó, ná maboko, ná mikuwa, pe bamekaka kokokanisa yango na moto. Pe bayebi ete eloko ebelemi koleka na moto, kolandana na ye, ezali mokomboso. Ezali ekelamu ebelemi koleka na moto; ata bongo, ekokani na moto ata moke te, aleki likolo.

135 Lolenge ya bomoi ya nse koleka ezali nde ligorodo; lolenge ya likolo koleka ezali moto. Nzambe abandaki na nse, pe Amataki, kino Akómaki likolo mpenza na elilingi na Ye. Alekaki na ba-ndeke pe ba-nyama, Amataki kino Akómaki na elilingi ya Nzambe. Asalaki moto na elilingi wana. Ezali lolenge eleki likolo. Lolenge ya nse koleka, ezali bobele litáká, oyo ebongwanaka ligorodo, pe bongo na bongo.

136 Kasi, eloko ezanga, oyo bakoki komona te. Botala Makomi sikawa. Bino, bokondima yango te, mingi kati na bino, kasi

nalingi. . . nalingi bosimba yango kati na bino. Pe bokanisa mabe mpo na yango te. Boyoka.

¹³⁷ Nayebi mingi kati na bino boyókaka nsango Docteur Dehaan. Ya solo. . . Moto monene lokola ye, ndeko Batiste ya mpiko, pe na solo nasepelaka na ye. Azali na mayele mingi ya bǎngó, pe—pe abósáná makambo mingi koleka ngai nakoyebaka te; mpo ye azali Docteur ya—ya Likindo, azali pe monganga, azali pe Docteur ya Zebi. Azali moto ya mayele mingi. Kasi alobaka ete baoyo. . . Ntango bana na Nzambe bamonaki ete bana basi na bato bazalaki kitoko; ye azuaka ngambo ya Josèphe, pe alobaka ete “bango—bango bakotaki na nzoto ya bato,” pe bazuaki basi kati na bango. Pe bato minene milai bazalaki na mokili ya Nod. “Pe bazuaki bango lokola basi pe bafandaki na bango, ntango bana na Nzambe, Banje babwakama, bazuaki, pe bamonaki bana basi na bato; pe mposa ya koyebana nzoto ezalaki makasi mingi, pe lokola bakomaki na lolenge ya masumu uta kobwakama, bakotaki na nzoto ya bato.”

¹³⁸ Soki basalaki yango, babebisi lobiko na nzoto uta na Nzambe, babebisi makambo nyonso mosusu. Soki zaboló akoki kokela, akokani na Nzambe. Zaboló akoki kokela te. Nalingi bolakisa ngai esika moko oyo zaboló akoki kokela. Akoki kokela te. Azali bebele kobebisa oyo ekelama. Azali mokeli te. Azali bebele mobebisi.

¹³⁹ Ee, bongo, nini esalemaki? Botala malamú. Lolenge ngai namonaka yango. Eloko ezangi yango oyo.

¹⁴⁰ Bongo, bazali na mokomboso, kasi okoki te kosangisa mokomboso na mwasi pe babota mwana. Okoki kosangisa moto na nyama moko te. Ekosimba te. Bakoki kozongisa yo makila ya nyama moko te.

¹⁴¹ Ntango nazalaki na Afrika, komona ndenge bazalaki konyokola bairido kuna; moto moko alobaki na ngai, alobaki: “Bazali bebele banyama.”

¹⁴² Nalobaki: “Tika koloba boye. Bazali mpenza bato lokola yo, ntango mosusu baleki yo moke.” Tika nayebisa yo, soki ozali na ezaleli ya ndenge wana, obandi kokóma lokola nyama. Nalobaki: “Mobali oyo, ata soki azali moindo tuu lokola makala, to soki azali motane soo, to soki azali bulé makasi, akoki kobikisa bomoi na yo na kopesaka yo makila. Kasi komeka soki moke te kotia makila ya nyama na nzoto na yo.” Ya solo, azali moto.

¹⁴³ Bebele mpo na mposó moko ezali moindo, mosusu sokóla, mosusu motane, pe mosusu pembe, yango ezali na ntina te. Biblia elobi: “Nzambe, uta na makila moko, Asali bato nyonso.” Pe ezali mpenza solo. Bisika tofandaka, nde ebongoli mposó ya nzoto na biso, yango ezali na likambo moko te. Nzambe, uta na—na moto moko Asali bikólo nyonso, na makila moko, bikólo nyonso ndenge moko.

144 Ba-Chinwa; moto moindo akoki koloba te, ee, moto moindo akoki koloba te ete: “Mo-Chinwa oyo, a—azali motane, nazali na ntina na ye te.” Azali ndeko na yo. Pe yo mondélé okoki koloba te na moto motane to moto moindo, to moko to mosusu: “Ngai nazali na ntina na yo te.” Azali ndeko na yo. Ya solo mpenza.

145 Sikawa botala, likambo esalemaki yango oyo. Nandimi, pe nakoki kozua Biblia mpo na kondimisa yango, ete nyoka moto asalaki yango. Nyoka nde ekelamu ezangi kati na moto ná mokomboso. Mpamba te, boyoka, botala malamau awa, nyoka azalaki kotambola na libumu te. Azalaki na “mayele mabe” koleka banyama nyonso ya mokili.

146 Sikawa, nakendeki lelo koluka na búku ya maloba ya lokóta, na bisika nyonso, koluka liloba oyo, kotala eloko liloba oyo *mayele mabe* elingi koloba. Elingi koloba “kozala na boyebi mingi, kozala na mayele ya kokosa,” pe, ndimbola ya malamau koleka ya—ya Baebele (ya m-a-h-a-h, mahah), elingi koloba “kozala na boyebi ya solosolo ya mibeko ya bomoi.”

147 Sikawa, tótala likambo yango naino na mwa ntango moke. Azali na boyebi mingi, azali na mayele ya kokosa, nzoka nde nkombo na ye ezali “nyoka.” Kasi, bobosana te ete, ye nde azalaki na boyebi mingi koleka, pe alandanaki na moto mingi koleka nyonso oyo ezalaki na mokili; ye nde azalaki pene na moto koleka. Azalaki kotambola na libumu te. Elakeli mabe nde esali ete atambolaka na libumu. Pe azalaki . . . Biblia elobi ete ye alekaki bango nyonso na kitoko.

148 Pe ata elakeli mabe elongoli kitoko na ye nyonso te; ata bongo, ba-langi kitoko ya nyoka engengaka, ná kitoko na ye ná mayele na ye mabe. Ata elakeli mabe elongola yango te. Kasi, bobosana te, Nzambe alobaki na ye ete akozala lisusu na makolo te pe akotambola na libumu. Pe okoki kozua mokuwa moko te kati na nyoka oyo ekokani na moto, pe yango wana bato ya zebi bazui mobulu. Kasi ye wana.

149 Nzambe abombaki likambo yango liboso na bato ya mayele pe ya bwanya, pe Alakaki ete akomonisa yango epai na bana na Nzambe, na mikolo na suka, ntango bana na Nzambe bakomonisama, ntango, “bana na Nzambe oyo bazalaki kosepela liboso ete mokili ezalisama.” Ntango emoniseli ya nkembo ya Bonzambe pe nyonso, ekopesama na mikolo na suka, Akomonisa makambo oyo na nzela na bana na Nzambe. Boyebi ete Makomi ezali koteya yango. Pe biso oyo tokómi. Yango wana Nzambe afungoleli biso makambo oyo. Nzambe azali komonisa bana na Ye. Azali kokende mosika koleka mayele nyonso ya bomoto, mosika mpenza kati na bimoniseli ya molimo, mpo na kopesa biso Yango. Toteyaki yango te, kati na Biblia oyo: “Moto oyo azali na mayele”? Ezali te makambo oyo ayekolaki na likindo moko boye; kasi oyo ayekolaki na mabolongo na ye liboso na

Nzambe, pe oyo Nzambe asepelaki kopesa ye. Bana na Nzambe, oyo bamonisami!

¹⁵⁰ Nyoka ye wana, sikawa botala ndenge nyoka azalaki; nakolimbolela bino makanisi na ngai likolo na ye.

¹⁵¹ Tozalaki na . . . toutaki na ligorodo, oyo esukaka na litáka, pe bongo na bongo, pe eloko *boye na boye*, kino koya kokóma na makáko, pe na mokomboso. Pe longwa na mokomboso, topumbwe kolongwa na mokomboso mpo na kokóma epai na moto, pe tozali komituna.

¹⁵² “Ee,” bato na zebi bazali koloba, “zela moke! Bisó tokoki kosangisa mwasi ná makáko, to oyo na oyo kuna, kosangisa moto ná mokomboso.” Ekosimba te. Sangisa ye na nyama mosusu nyonso; ekosimba te. Makila na bango ekosangana te; zua makila na yo, ezali makila moko oyo ekesani mobimba, mobimba mpenza.

¹⁵³ Makila mosusu ezali na katikati na bango mibale awa, pe bazali komona nyama yango te. Oh, alelua, nabandi komiyoka mosambeli sika-sikawa. Botala. Mpo na nini? Nzambe abombeli bango yango. Mokuwa moko te ezali kati na nyoka oyo ezali lokola mokuwa ya moto. Ye abombaki likambo yango mosika mpenza, na lolenge ete mayele na bato ekoka komona yango te.

¹⁵⁴ Pe nakolakisa bino esika moto ya mayele mabe wana autaki, esika—esika akómi, na lolenge nyonso. Bomoni, akoki koya na nzela wana te.

¹⁵⁵ Esengeli koya na nzela na emoniseli, “Yo ozali Klisto, Mwana na . . .” “Likolo na libanga oyo Nakotonga Lingomba na Ngai; pe bikuke na ewelo ikoki kolonga liboso na yango te,” emoniseli ya molimo. Ndenge nini—ndenge nini Abele ayebaki ete esengelaki kokaba mwana na mpate, na esika ya kokaba mbuma na elanga lokola Kaina? Azuaki emoniseli ya molimo. Okoki kozua yango na makindo te. Okoki kozua yango na bibongiseli te. Okozua yango nde uta na Likolo.

¹⁵⁶ Sikawa, botala malamú nyoka oyo, nyoka oyo ya ebandeli. Tika totalisa ye na elili sikawa. Azalaki mobali monene mpenza. Azalaki na katikati na mokomboso ná moto. Pe, nyoka; zabolo, Lusifele, ayebaki ete bobele makila wana nde ekokaki kosangana na makila ya moto, moto moko oyo ye akokaki kosalela ezalaki bobele nyoka. Akokaki kosalela mokomboso te, makila wana ekokaki kosangana te. Akokaki kosalela biloko ebele te. Akokaki kosalela mpate te. Akokaki kosalela mpunda te. Akokaki kosalela nyama moko te; asengelaki kosalela nyoka oyo.

¹⁵⁷ Tozua ye sikawa pe totala soki azali ndenge nini. Azali mobali monene mpenza, mobali monene ya kalakala. Kuna nde esika bazali kozua mikuwa ya minene wana, pe nakotalisa bino yango na kati na Biblia. Sikawa, bolanda na bokebi mpenza. Malamú. Mobali monene oyo, toloba ete ye—ye azalaki na bolai

ya pieds zomi, pe azalaki na ntólo monene; azalaki mpenza lokola moto. Pe makila na ye; nsima na kosangisa banyama moko pe mosusu. Okoki kosangisa banyama oyo ekesani. Pe epesaka kaka lolenge ya makila ya likolo koleka, lolenge ya bomoi ya likolo koleka, lolenge ya likolo koleka, kino kokóma na likolo mpenza, na mosanda ya moto. Kasi eloko ya suka, oyo ezalaki kokanga bango mibale awa, ekatanaki. Bato boni bayebi ete bato ya zebi bazali na bango kozua te eloko oyo ezangi? Bino nyonso boyebi yango. Mpo na nini? Ye oyo, nyoka. Azalaki kuna, mobali monene.

Pe zabolo akitaki, kuna, alobi: “Nakoki kopesa ye pemela.”

¹⁵⁸ Sikawa, ntango obandi kotala basi, ná bizaleli ya basi, obosana te, opakolami na zabolo, (ye, azali mwasi na yo te).

¹⁵⁹ Botala, sikawa, zabolo akitaki pe akoti kati na nyoka. Pe akutaki Ewa na kati na elanga na Edene, bolumbu, pe alobelaki ye na ntina na mbuma oyo ezalaki na katikati. *Katikati* elingi koloba “na kati ya,” pe nyonso; bozali kososola ngai, tozali na losambo ya basi pe mibali. Pe alobaki: “Kasi, ezali elengi. Ezali kitoko na miso.” Bongo asalaki nini? Abandaki kosala bolingo ye na Ewa, pe asanganaki na ye, lokola mwasi na mobali.

¹⁶⁰ Bongo mwasi amonaki ete ezalaki elengi, pe akei koyebisa mobali na ye, kasi asilaki kozua zemi na Satana.

¹⁶¹ Pe abotaki mwana na ye ya liboso, na nkombo Kaina, mwana na Satana.

“Kasi,” bozali koloba, “likambo oyo, ezali lokuta.”

¹⁶² Malamu, tokotala kaka soki ezali lokuta to te. “Pe Nakotia bongúná kati na Momboto na yo pe momboto na nyoka.” Nini? Momboto na Nyoka! Mwasi azalaki na Momboto, pe ye azalaki na momboto. “Ye akonyata motó na yo, pe yo okosua Ye na litindi.” Pe *kosua*, wana, elingi koloba “kosala Lisiko.” Bongo, “momboto” na bino ya nyoka yango wana.

Sikawa, botala, mibali mibale bango wana bayei.

¹⁶³ Bongo, nyoka, ntango atelemaki wana, mobali monene wana, akweaki na likambo, asalaki ekobo na mwasi ya Adama. Lisumu ezali lelo wapi? Eloko nini ezali kokómisa makambo ndenge ezali lelo boye? Sikawa, ngai—ngai. . . Na ntembe te bokoki kososola likambo nazali koloba. Pe likambo oyo esalemaki, yango wana.

Pe ntango asalaki yango, Nzambe alobaki, Abandaki kobenga Ewa ná Adama.

Pe alobaki: “Nazali bolumbu.”

Pe Alobaki: “Nani ayebisi yo ete ozali bolumbu?”

¹⁶⁴ Bongo babandaki kosala lokola na mapinga, kopesa fóti na moto oyo azali na nse. Alobaki: “Ee, mwasi oyo Yo opesaki ngai, moto asali yango. Ye moto asali ete nándima.”

165 Mwasi alobaki: “Nyoka moto apesi ngai mbuma”? Tala, motei, zongela bomoto na yo.

166 Mwasi alobaki: “Nyoka moto apengwisi ngai.” Boyebi nini *kopengwisa* elingi koloba? Elingi koloba “koyeisa mbindo.” Ayeisamaki mbindo. Zabolo apesaki ye mbuma soki moke te. “Nyoka apengwisi ngai.”

Na nsima, elakeli mabe eyaki.

167 Alobaki: “Mpo ete yo oyoki nyoka na esika oyoka mobali na yo, yo olongoli Bomoï na mokili. Pe oko—okobakisa mpasi na yo; pe mpo na zemi na yo okotalela mobali na yo,” pe bongo na bongo.

168 “Pe, mpo ete yo oyoki mwasi na yo, na esika oyoka Ngai (Nazuaki yo kati na putulu; lolenge ya ekelamu ya likolo koleka), okozonga pe na putulu.”

169 “Pe yo nyoka, mpo ete osali yango, tala okozala lisusu na makolo te. Okotambola na libumu, mikolo nyonso na bomoi na yo. Pe bakoyina yo. Pe mabele ekozala bilei na yo.” Yango wana. Eloko oyo ezangaki, yango wana.

170 Sikawa, Kaina ye wana ayei. Totala bizaleli na ye. Kaina ye wana ayei. Azalaki nani? Azalaki moto ya misala ya mombongo. Azalaki kosala bilanga. Azalaki moto ya boyebi mingi, moto ya mayele; mosambeli, mosambeli mpenza; botala malamumu mi—botala malamumu misala na ye. Bolanda ngai lisusu na mwa ntango moke.

171 Ye wana ayei. Ayebaki ete azalaki na lobiko malamumu. Azalaki kolinga kokende na losambo. Amitongelaki ndakonzambe, abongisaki likabo na ye. Amemaki etumbelo, pe nyonso. Atongaki etumbelo, atiaki felele na ye likolo na yango. Atiaki elanga, mbuma ya elanga na ye, apesaki yango epai na Nzambe. Alobaki: “Yango wana Yawe, ezali ya Yo. Nayebi ete biso toliaki mbuma, yango nde eboto makambo nyonso oyo.” Bana na ye mosusu bazali kaka na likanisi ya ndenge wana. Ezali kolakisa esika eutaki. Ayaki na mbuma na ye, oyo eutaki na elanga, atiaki yango wana, pe alobi: “Oyo ekolimbisa masumu.”

Nzambe alobaki: “Ezalaki mbuma te.”

172 Kasi, na emoniseli ya molimo, Abele ayebaki ete ezalaki nde makila. Bongo amemaki mwana mpate, akataki ye kingo, pe akufaki.

173 Nzambe alobaki: “Ezali yango. Eutaki na yango. Ezalaki makila.” Boyebi makila oyo nazali kolobela. Malamumu. “Eutaki nde na makila.”

174 Sikawa, botala malamumu. Pe ntango Kaina amoni ete ndeko na ye montútuki andimami na miso na Nzambe, bilembo pe bikamwa ezali kosalema kuna, ayokeli ye zúwa. Alobi: “Tokosukisa likambo yango sika-sikawa.” Botala bandeko na ye, botala bana na ye, lelo lisusu. “Kasi, ngai naleki ye na

mayele,” bongo abandi koyoka nkanda. *Nkanda* eutaki wapi? Bokoki koloba ete nkanda. . . ? Abomaki ndeko na ye. Azalaki mobomi.

¹⁷⁵ Bokoki kobenga Nzambe mobomi? Pe Adama azalaki mwana na Nzambe. Biblia elobi, ete “Adama azalaki mwana na Nzambe,” moto ya peto ya ebandeli kuna. Adama azalaki mwana na Nzambe. Pe zúwa wana, ná motema mabe wana, pe nyonso, ekokaki kouta na liziba ya peto wana te.

¹⁷⁶ Yango esengelaki kouta epai mosusu. [Eteni oyo ezangi maloba na bande—N.D.E.] Pe eutaki nde na Satana, oyo azalaki mobomi, longwa na ebandeli. Biblia elobi: “Azalaki mokosi pe mobomi, longwa na ebandeli.” Pe yango wana. Pe abomaki ndeko na ye.

¹⁷⁷ Pe yango ezalaki etaliseli ya liwa na Klisto. Na nsima, uta na yango, na ntembe te, Atelemisaki Sete mpo na kozua esika na ye. Liwa, kokundama, pe lisekwa na Klisto.

¹⁷⁸ Pe botala malamumu, na nsima, bato na bino ya minene bango wana bayei. Na nsima, Kaina akendeki na mokili ya Nod. Soki papa na ye azalaki mobali monene, Kaina akozala lokola nani? Lokola papa na ye. Pe akendeki na mokili ya Nod, pe amemaki moko na bandeko na ye ya basi.

¹⁷⁹ Lolenge mosusu oyo akokaki kosala ezali te. Basi mosusu nyonso, basengelaki kobotama bobele na Ewa. Balobaka ete babotaki bana mibali na ya basi ntuku nsambo. Soki—soki basi bazalaki te. . . Biblia elobelaka basi ntango babotamaka te, bobele mibali. Pe ntango, soki basi mosusu bazalaka te libanda na Ewa, ntango ye akufaki, bato balingaki kozala lisusu te. Asengelaki kozala na bana basi. Pe Kaina asengeki kobala mwasi bobele ndeko na ye moko.

¹⁸⁰ Akendeki na mokili na Nod, pe azuaki—azuaki mwasi na ye. Pe, ntango abalaki mwasi yango kuna, kuna nde esika bato minene wana babotamaki, bazalaki bana na Nzambe oyo bakweaki; oyo bautaki na papa na bango, zabolo, na nzela na Kaina. Eloko na bino oyo ezangaki, yango wana.

¹⁸¹ Pe botala malamumu momboto na nyoka. Sikawa, botala malamumu. Bobosana te ete, momboto na nyoka esambelaka. Botala ndenge ebandaki kosala mosala, kuna, na mwa ntango moke. Yango oyo ekei, momboto na nyoka. Bakómaki banani? Botika nátanga eloko moko awa, oyo nakomi kaka na nsima na nzanga oyo.

¹⁸² Banani babimaki na libota na Abele? Boyoka likambo oyo. Malamumu. Abele ayaki. Nsima na Abele, Sete ayaki. Nsima na Sete, Nowa ayaki. Nsima na Nowa, Seme ayaki. Nsima na Seme, Abalayama ayaki. Nsima na Abalayama, Yisaka ayaki. Nsima na Yisaka, Yakobo ayaki. Nsima na Yakobo, Yuda ayaki. Nsima na Yuda, Dawidi ayaki. Nsima na Dawidi, Klisto ayaki, kobonga be.

183 Botala, kalakala kuna, ndenge Molimo na Nzambe efandaki kati na Abele. Botala ndenge Efandaki kati na Sete. Botala ndenge Efandaki kati na Yuda. Botala ndenge Efandaki kati na Dawidi. Botala Molimo yango moko oyo ezalaki kobenga, na nzela na momboto ya sembo, banda na ebandeli kino na suka. Ata soki basalaki nini, baponamaki liboso.

184 Botala Yakobo, moto mabe . . . Nazali koloba yango te mpo na kotuka. Kasi Yakobo, mwa mokosi wana, azalaki ntango nyonso kaka na makolo na mama na ye; azalaki kobaluka-baluka kaka wana, mwa éféminé moko boye. Atiaki biloko moko na mokongo na ye, pe akei kokosa tata na ye, mpo azua lipamboli; kasi esilaki kopesamela ye liboso ete mokili ezalisama. Na ntembe te, epesamelaki ye.

185 Akendeki kuna, pe akosi tata-bokilo na ye; pe azuaki bitape ya matóno-matóno, bitape ya nzete peuplier, pe atiaki yango na mai, mpo na kobangisa bibwele, ntango bazalaki na zemi; mpo babota bibwele oyo ezali na matóno-matóno, mpo akoka kokosa pe azua bibwele yango. Nzambe apambolaki ye kati na likambo yango. Ya solo.

186 Mawa na moto oyo akoloba likambo moko na ntina na Yakobo. Boyebi likambo—boyebi likambo oyo mosakoli ya lokuta alobaki. . . To, asakolaki bosolo, Balame, alobaki: “Moto oyo akopambola ye akopambolama, pe moto oyo akolakela ye mabe akolakelama mabe.”

187 “Nakamataki yo, Yakobo. Nazuaki ye lokola . . . lokola na mboka mopaya. Pe ndenge mpongo abatelaka zála na ye, Nabatelaki ye pe Nabimisaki ye.” Alelua! “Na nzela na nguya te, na nzela na makasi te, kasi na Molimo na Ngai, Yawe alobi bongo.”

188 Botala malamau ndenge etamboli kino na kobonga be oyo. Molimo yango esalaki mosala, kino na kobonga be epai na Klisto, Alekaki epai na Bankoko moko na moko, mpo na kokóma kino wana. Ata soki basalaki nini, balobaki nini, basalaki nini, bazalaki na ntembe te momboto ya moyengebeni.

189 Pe, kuna, ntango moyengebeni Abalayama . . . Nkembo! Oh, Nazali komiyoka malamau mpenza. Ntango moyengebeni Abalayama akutanaki na Melekisedeke, Oyo azalaki Nzambe Ye moko!

190 Melekisedeke azalaki Nani? “Mokonzi na Saleme, elingi koloba Mokonzi na Yelusaleme, Mokonzi na kimia. Azalaki na tata te. Azalaki na mama te. Azalaki na ebandeli na mikolo te, to na suka te.” Ata soki Azali Nani, Azali kaka na bomoi. “Abotámá te. Akokufa mokolo moko te. Akozala na tata to na mama mokolo moko te. Akozala na ebandeli ya mikolo to na suka mokolo moko te.” Yebisa ngai Azalaki Nani. Yawe Nzambe; na oyo tobengaka . . .

¹⁹¹ Oh, nabosani ndenge bobengaka yango sikawa. Teofani, yango wana. Ezali lokola na... Ezali lisapo te; kasi bobele likambo moko oyo esalemaki. Ndenge Ayaki epai na Abalayama kuna na héma, lokola mwanje, pe Asakolaki, pe Ayebisaki Sala ete aseki, na nsima na Ye, pe nyonso. Likambo nde yango wana, ndenge moko.

¹⁹² Bongo Azalaki wana. Akutanaki na Melekisedeke. Pe nko-...nkoko na nkoko Abalayama, na momboto ya moyengebeni, afutaki moko na zomi epai na Melekisedeke; pe batangelaki yango nkoko na nkoko na ye, oyo ayaki nsima kuna, momboto na moyengebeni.

¹⁹³ Sikawa, momboto na—na nyoka yango wana. Sikawa, bobosana te ete, bongúná ekozala, bitumba kati na bango.

¹⁹⁴ Momboto na nyoka eyei, pe ezali kobota nini? Sikawa, tozua mibu ya liboso. Sikawa, botala malamumu makambo oyo esalemaki kuna. Tokotanga yango mbala moko, mpo nauti kotala yango. Momboto na nyoka ebotaki Kaina. Kaina akendeki na mokili na Nod, abotaki mibali minene, pe na nsima bakendeki na mokili na Nowa.

¹⁹⁵ Bazalaki bato na boyebi mingi, na mayele, batangaki mokanda. Ezali ya solo? Bazalaki batóngi ya ndako, bato ya kobimisa biloko, bato ya zebi; na nzela na momboto ya moyengebeni te, kasi na nzela na momboto ya Satana, nyoka. Bazalaki bato moko lokola—lokola bato ya zebi, pe batóngi ya ndako, pe bato minene, balakisi. Makomi elobi bongo. Bazalaki kosala biloko ya motako. Bazalaki kosala biloko ya bibúni. Bazalaki kosala biloko ya bibende. Bazalaki kobimisa biloko. Bazalaki koyeisa bibende ya ndenge na ndenge makasi, pe kotonga ba-ndako, pe nyonso. Makomi elobi bongo. Pe bazalaki kotiola Momboto na mwasi, Nowa, moyengebeni. Ezali ya solo? [Losambo balobi: “Amen.”—N.D.E.]

¹⁹⁶ Tolandela bango mwa mosika. Na nsima, toyei komona bango kino na masuwa, biloko nyonso ebomamaki. Ezalaki bofuluki moko ya masumu ya koloba te, pe bazuaki bokonzi, bato ya boyebi koleka ná ya mayele. Kino ete, Nzambe atalaki uta na likolo, baoyo batikalaki bazalaki mingi te, bongo Akotisaki bobele Nowa ná libota na ye na masuwa, pe Anokisaki mbula pe Abomaki biloko nyonso. Liboso, Anetolaki Enoka. Boye te? [Losambo balobi: “Amen.”—N.D.E.] Momboto mobimba bazalaki wana, penepene momboto mobimba; kasi Azalaki na mwango oyo esengelaki kokokisama.

¹⁹⁷ Sikawa, Nowa ná bana na ye, oyo babimaki, Hama, Semi ná Yefete, bautaki na libota ya moyengebeni.

¹⁹⁸ Ndenge nini momboto yango elekaki na ngambo mosusu? Momboto yango ekotaki na masuwa, kaka ndenge ekotaki na ebandeli, na nzela na mwasi, basi na bango. Bamemaki momboto

na Satana na kati na masuwa; kaka ndenge Ewa amemaki momboto na Satana, mpo na kobota Kaina, na nzela na mwasi.

¹⁹⁹ Pe bozali kotia basi wana batei na bitumbelo na bino, nzoka nde Biblia ezali kopamela yango! Polo alobaki: “Soki moto nani akanisi ete azali mosakoli, to moto na molimo, asosola ete makambo oyo nakomeli bino ezali mobeko na Nkolo; kasi soki atioli yango, na bongo ye moko atiolama.”

²⁰⁰ Ezali mpo na yango nde nalongwaki na lingomba Batiste, awa. Ndeko Fleeman azalaki awa eleki mwa ntango moke; nakanisi azalaki kuna na mpokwa wana. Docteur Davis alobaki: “Ókomata awa pe ókobulisa basi wana lokola batei.”

Nalobaki: “Ngai nakosala yango te. Mokolo moko te.”

Alobaki: “Ee, nakobwaka yo libanda.”

²⁰¹ Nalobaki: “Basilá kobwaka ngai libanda na bisika kitoko koleka oyo.” Nalobaki: “Oyo, ezali Liloba na Nzambe, pe Ezali kopamela likambo wana. Pe ngai nakoki kosunga eloko oyo Nzambe azali kopamela yango te.” Te, misie.

²⁰² Bato oyo basalaka yango, bazali kolakisa ete bazali balakisi ya lokuta, basakoli ya lokuta. Biblia elobi ete bakozala. “Bakopengwisa ata baponami, soki nde ekokoka.” Yango wana.

²⁰³ Sikawa botala likambo oyo. Pe banda wana, na nsima, Hama ayaki, Hama ná mwasi na ye, ná bamosusu. Azalaki na elakeli mabe likolo na ye. Uta na Hama Nemrod ayaki, oyo atongaki Babilone. Uta na Babilone lingomba Katoliko eyaki, ebandeli na yango. Na nsima ekitaki epai na Akaba. Na nsima elongwaki epai na Akaba, ekoti epai na Yuda Mokeliota; eyei kosuka, na motemeli na Klisto.

²⁰⁴ Pe na mikolo na suka oyo, molimo na motemeli na Klisto ná Molimo na Klisto ezali awa. Molimo na motemeli na Klisto ezali koloba: “Mikolo na bikamwa esilá koleka.” Molimo na Klisto ezali koloba: “Azali ndenge moko lobi, lelo pe libela.” Molimo na motemeli na Klisto ezali koloba: “Bokeseni moko ezali te, ata soki bapesi yo libatisi na ‘Tata, Mwana, Molimo Mosantu,’ basopeli yo mai, bamwangiseli yo mai, to nini lisusu, ezali kaka ndenge moko.” Biblia elobi ete Nzambe akweyaka te, pe Akoki kobongwana te. Yo okosalela nani? Ezali likambo na yo.

²⁰⁵ Bongo, bokoloba: “Bakoki kofanda esika moko? Olobaki ete, kuna na masuwa, Ndeko Branham, bango mibale bazalaki kuna, Hama ná Sete.” Ya solo, ezali mpenza bongo. Hama azalaki mabe. Sete azalaki mosambeli pe moyengebeni. Malamumu.

²⁰⁶ Tolandela naino Hama. Malamumu, ee, Hama ná Sete bazalaki kati na masuwa yango moko; moko moyengebeni, pe mosusu mozangi boyengebeni. Eyanganga ná ebenga bazalaki kati na masuwa yango moko. Yuda ná Yesu bazalaki kati na losambo yango moko. Motemeli na Klisto ná Molimo Mosantu bazalaki kati na losambo yango moko.

207 Pe, lelo oyo, kaka milimo yango ezali kosala mosala. “Bazali na lolenge na kosambela, basambeli minene, bazali na lolenge na kosambela, nde bazali koangana Nguya na yango; zala mosika na bato ya ndenge wana.” Molimo Mosantu azali koloba ete “Yesu Klisto ndenge moko lobi, lelo, pe libela.” Ngambo nini yo okopona?

208 Motemeli na Klisto azali koloba ete *Oyo*, ezali bobele búku moko ya bisakola. “Tokotanga Esakola ya Bantoma.” Nazali kobeta mondéngé na motei nyonso ete alakisa ngai esika Esakola ya Bantoma ezali kati na Biblia: “Nayambi Nzambe, Tata wa Bokasi bonso, Mozalisi wa likolo na nse, kati na Yesu Klisto, Mwana wa Ye. Nayambi Eklezia Esantu Katoliko ya Roma, lisanga lya basantu.” Bomoni yango wapi na kati na Biblia? Nzoka nde, bozali kotanga yango kati na mangomba na bino minene ya ba-Methodiste pe ya ba-Batiste. Ezali malakisi ya zabolo, pe basakoli ya lokuta nde bazali koteya yango.

209 Pe nazali kolikia ete nazali kobetisa bino libaku te, kasi nazali kobeta nsete ete losambo oyo basosola yango malamumu. Bino bato ya Branham Tabernacle awa, bosala makambo ya ndenge wana te. Nyonso oyo endimaka lisanga lya bansatu, ezali makambo ya solóka. “Molobeli na kati na bato ná Nzambe, azali bobele moko, pe Moto yango ezali nde Yesu Klisto.” Ata soki ba-Malia bazali kuna boni!

210 Bomoni eloko momboto yango ya mwasi esalaki kuna? Bomoni ndenge momboto ya mwasi ekatisaki kuna?

211 Botala lelo oyo, awa na Amerika. Amerika ezali momboto ya zabolo. Oyo likambo nini? Ezali ekólo ya mwasi. Boyokaki nsango ete: “Oyo ezali mokili ya mwasi.” Ya solo. Ezali ekólo ya mwasi. Basi bato basimbi yenda.

212 Nakendeki, eumeli te awa, kuna na Suisse. Basi bazalaki koloba. . . Mwasi moko ya moke, azalaki na Molimo Mosantu, alobaki: “Oyebi, soki nakei na Amerika, balobaka ete kuna, basi bazali na bonsomi.”

213 Nalobaki: “Tika nayebisa yo epai wapi yango ezali komema.” Pe nabandi koyebisa ye.

Alobaki: “Oh, mawa, nalingi yango lisusu te.”

Nalobaki: “Ezali komema bato nde kuna.”

Boyebi, kuna, basalaka makambo ndenge bazali kosala awa te.

214 Ezali nini? Botika nalakisa bino ete Amerika ezali mwasi. Na mbongo na biso ya bibende, elongi ya mwasi ezali wana. Na nyonso oyo tozali na yango awa, mwasi azali wana.

215 Yebisa ngai, bisika ya komela masanga ezali mingi te kati na mboka oyo, ekozala. . . Bokoki kotia bisika ntuku minei ya komela masanga kati na engumba oyo, pe kotia bandumba misato, basi ya kitoko oyo bazali kotambola na kodéndá-déndá

na kati na balabala; baktotinda milimo ebele koleka na lifelo, mpo na kolula bango, koleka bisika nyonso ya komela masanga oyo bokoki kotia na engumba oyo. Ezali solo mpenza.

²¹⁶ Bongo, ezali nde nani? Ezali nde mwasi. Azali nani? Azali nzambe ya Amerika.

²¹⁷ Bazali kozua ba-vedette ya basi wana ya kala ya cinema; pe bazali komilakisa kuna, babálá mbala minei to mitano, bazali kobika na mibali misato to minei oyo bakeseni na mbala moko; pe ba-zulunale mosusu ezali kotalisa pe kolobela bango, pe bazali kokanga basi yango ba-fóto ntango bazali bolumbu, wana. Pe bino, bilenge basi, bozali kozua yango lokola ndakisa, (mpo na nini?) ezali na ntina na mama na bino, oyo azalaki liboso, ntango mosusu, to nkoko na bino ya mwasi oyo azalaki liboso. Bomoni esika momboto wana ya nyoka ezali kosala mosala? Na ntembe te, ezali bongo.

²¹⁸ Pe ezali kosala nini? Soki lisumu na nko ezalaki kozua etumbu kati na mabota zomi na minei, na ntango na mobeko, lisumu na nko ekozala ndenge nini soki ezui etumbu lelo, wana momboto na moyengebeni ekómi pene na kosila? Pe Nzambe alobaki ete ntango moko ekoya, soki Ayeisaki mosala mokuse te, mbele balingaki ata kotikala te. Tokómi na ntango na suka. Bokende koluka bayengebeni yango na mpokwa oyo; bokende kati na bingumba!

²¹⁹ Oh, bokomona bandimi ya losambo, oyo bazali mpenza sembo epai na ba-Batiste pe epai na ba-Presbyterien, pe nyonso, ndenge bakoki kozala. Kasi bazali ata na ntina ya makambo na Nzambe te ndenge lapin azali na ntina te ya sapato oyo batambolaka na yango na matandala. Bayebi eloko te! Nyonso oyo bayebi... Ozali Moklisto? "Nazali Katoliko." Ozali Moklisto? "Nazali Batiste." Ozali Moklisto? "Nazali Presbyterien." Ozali Moklisto? "Nazali Pentekotiste." Yango ezali na ntina moko na kati na likambo Oyo te.

²²⁰ Ozali Moklisto, mpo ete Nzambe, na ngolu na Ye, abikisi yo. Pe eyebi likambo Yango. Pe eloko moko ebongoli bomoi na yo, na lolenge ete okómi kobika ndenge mosusu. Pe okómi moto ya sika, pe ekelamu ya sika kati na Klisto Yesu. Ya solo.

²²¹ Kasi, bomoni esika momboto na nyoka ezali? Momboto na nyoka, ezalaki nini? Ekobo. Bozali kolanda ngai? Ekobo na Ewa. Eloko nini ekómeli yango? Eloko nini eboti yango? Ekómi nini na mpokwa oyo?

²²² Botala, kala, eleki mwa mibu, ntango nzembo ya liboso ebimaki. Bino, mikóló koleka, ntango nze... Liboso, bazáláká mpenza kotala banzembo, liboso eleka na radio. Pe nzembo ya liboso oyo ebimaki, ezalaki: "Bóbalola, bilenge basi, bóbalola, mabolongo na bino ya kitoko, esengeli kolakisa yango," pe nyonso wana. "Bóseka papa ná mama, boseka bango nyonso 'ha-ha-ha!'" Nzembo ya liboso oyo batikaki yango wana. Bozali

kokanisa ete azali wapi na mpokwa oyo, elenge mobali oyo akomaki nzembo yango? Akufa.

223 Bozali kokanisa nini mpo na mwasi oyo Clara Bow, oyo abimaki moto ya liboso pe alobelaki mabina wana ya *Courbes Dangereuses*; ná mabína wana ya kolongola bilamba oyo etindi milimo nkóto na nkóto na lifelo? Bozali kokanisa ete azali wapi na mpokwa oyo? Asilá kokufa kala mpenza. Azali wapi, na nzoto wana oyo azalaki na yango? Azali kuna, apolá, kati na mabele, pe mpambo ná mampiká balia ye. Pe molimo na ye ezali kuna liboso na Nzambe ya sembo.

224 Wapi mobali oyo abalaki mwasi wana pe asalaki bilamba wana ya bosoto oyo basi bazali kolata, oyo ezali komonisa nzoto ngambo na ngambo, pe ekokani malamú te? Nalobaki: “Mpo na nini basi bazali kosala bongo? Mpo na nini bozali kolata biloko ya ndenge wana?” Mpo bolingi ete mibali batala bino, pe lolenge mosusu ya kotalisa yango polele ezali te.

225 Pe oyebi ete ntango ozali kosala bongo, pe mwa mosumuki moko boye atali yo, oyebi eloko nini esalemi wana? Na Esambiselo . . . Okoloba: “Ndeko Branham, ngai nazali mpenza sembo epai na mobali na ngai na ndenge ekoki.” Okokweya na likambo ete osalaki ekobo. Yesu alobaki: “Ye nani akotala mwasi na mposa mabe na ye, asili kosala na ye ekobo na motema na ye.” Ntango ekosenga ete mobali wana azongisa monoko mpo na ekobo asalaki, nani moto asalaki ete likambo yango esalema? Lolenge oyo olataki pe obimaki na yango.

226 Sikawa, nalingi koloba te ete osengeli kolata lokola bato ya kalakala. Kasi, okoki komonana mpenza lokola mama.

227 Pe kobima libanda ndenge wana, pe olongoli bilamba, ná mwa kupé na yo ya mokuse, na mwa nsinga oyo ekangami zongazonga na yango boye; na bebe na yo oyo miso na ye lokola eloko batiaka putulu ya makaya, pe yo likaya na monoko, ozali kotambola na nzela. Ozali kosala yango mpo na ntina moko ya malamú te. Ekoki kozala ete osali na yo likambo yango te, kasi zabolo azali kozua yo lokola esaleli, kaka ndenge asalaki na Ewa.

228 Mpo na nini ezali ekólo ya mwasi? Mpo ezali komema mbala moko kokonzama ya Bokatoliko. Likambo nini ezali lelo? Okoyoka bango bazali kotanga Nkombo na Yesu te. “Malia losako! Malia, mama wa Nzambe! Santu Cecile!” Basantu nyonso ya ndenge na ndenge, basantu oyo bakufá. Eumeli te awa, kuna na . . .

229 Nazalaki na Mexique mobu eleki. Mwasi moko ye wana azali koya, azali konguluma na nse. Mabolongo na ye, ezokaki nyonso ndenge azalaki konguluma, pe ekómaki makasi; azalaki kolela, pe kosimba maboko na ye. Pe tata azalaki kotambola wana, amemi bana mike mibale, oyo bazalaki kolela; mama wana azalaki koyoka mpasi mingi; mpo ete mwasi moko, oyo bango

bazalaki kobenga mosantu, akufaki. Batiaki ekeko na ye kuna likolo na ngomba. Mobali moko oyo alingaka basi mingi abomaki ye. Pe kaka ndenge andimaki ete báboma ye bongo, na ntembe te, akómi na ye mosantu; azalaki mo-Katoliko. Bongo, mwasi oyo akendeki kosala etumbu ya masumu na ye; pe asengelaki konguluma na nse ntaka ya mile mibale, likolo na mabanga, mpo na kosala etumbu ya masumu na ye.

²³⁰ Ndeko, soki eloko moko ezali oyo ngai nasengeli kosala, loba ete Yesu Klisto akufaki mpamba. Na ngolu, nabikisami; kasi na—na ngai moko te, kasi na mokano na Nzambe, pe na boboto na Nzambe.

²³¹ Bapanzi ya nsango wana batunaki ngai, balobaki: “Misie Branham. . .” Be—bebe moke wana, oyo akufaki pe asekwí, ná makambo mosusu wana. Ba-Katoliko nkoto ntuku misato. . . Te, bolimbisa ngai. Ezalaki nde bato nkoto ntuku mibale. Bato nkoto ntuku misato ezalaki nde na Afrika. Ba-Katoliko nkoto ntuku mibale bayambaki Klisto lokola Mobikisi na bango moko, na mbala moko, ntango yango esalemaki, ntango nazalaki na engumba Mexique. Pe banganzambe wana, bakokaki koloba eloko te; bato bazalaki mingi mpenza, elingaki kobimisa mobulu. Bato mingi bazalaki ngambo moko. Bongo balobaki: “Misie Branham, ozali kondima ete basantu na biso bakoki kosala likambo yango moko oyo ozali kosala?”

²³² Lokola nayebaki malakisi na bango, nalobaki: “Na ntembe te, soki bazali na bomoi.” Bomoni? Bongo, okoki kozala mosantu ya Katoliko te, soki naino okufi te, boyebi.

Bongo, alobaki: “Oh, okoki kozala mosantu te soki naino okufi te.”

²³³ Nalobaki: “Yo otangi yango wapi? Polo alobaki: ‘Epai ya basantu oyo bazali na Efese,’ pe baoyo Nzambe abiangi. ‘Epai ya basantu oyo bazali na Efese,’ bazalaki kotanga mokanda na ye; pe basantu oyo bazali bisika mosusu, na Galatia, pe—pe ‘basantu ya Roma,’ pe bongo na bongo. *Basantu*, ‘bato oyo babulisami.’ Olobi nini mpo na yango?”

²³⁴ Alobaki: “Na ntembe te, kasi, tosengeli kowelana na Biblia te. Mpo ete, biso tozali lingomba, pe yango nde oyo lingomba elobi. Oyo Biblia elobi, etali biso te. Oyo lingomba elobi nde.” Alobaki: “Na bongo, likanisi na yo ezali nini mpo na lingomba Katoliko?”

²³⁵ Nalobaki: “Elingaki kozala malamú ete otuna ngai likambo wana te. Lokola otuni ngai, na bongo, nakoyebisa yo Solo.”

Alobaki: “Kasi, nalingi oyebisa ngai Solo.”

Nalobaki: “Lolenge ya solóka ya likolo koleka oyo nayebi.”

Alobaki: “Okómi tii kuna ndenge nini?”

²³⁶ Nalobaki: “Nyonso oyo esambelaka bakufi, ezali solóka.” Nalobaki: “Soki mosantu wana ayanoli, loba ete azali na lifelo.

Mpamba te, baoyo bakatishi nzela, Biblia na—na ngai elobi ete akoki koyanola te.” Ya solo. Pe nalobaki: “Soki azali moko na bango, soki azali mosantu; zabolo moto azali koloba lokola mosantu, kasi ezali mosantu wana te, na nyonso.”

²³⁷ Pe alobaki: “Kasi, zela naino mwa moke.” Alobaki: “Yo pe osambelaka bakufi.”

Nalobaki: “Wapi?”

Alobaki: “Yesu Klisto akufá.”

²³⁸ Nalobaki: “Kasi Ye asekwá. Ye akufá te. Kasi Azali na bomoi, mpo na kolobela, molobeli bobele moko na kati na Nzambe ná bato.”

²³⁹ “Ngai Moto nakufaki, pe Nazali lisusu na bomoi, pe Nazali na bomoi libela na libela. Nazali na mafungola na kufa pe na ewelo.” “Tika ete moto oyo alingi aya, pe amela mai na Bomoi ofele.” Hólála! Tala Nzambe na biso. Tala Nzambe na biso.

²⁴⁰ Pe momboto na moyengebeni ekómi pene na kosila. Yebisa bato makambo oyo. Yebisa bato bazongela lolenge ya kosala makambo na lolenge ya Biblia. Yebisa bato nsango na bikamwa. Yebisa bato makambo yango. “Lingomba na bango endimaka Yango te,” yango wana bazali bana makango, epai na Nzambe. Biblia elobi ete soki tokoki te koyika mpiko na minyoko, na komekama, na kotioluma, pe babenga biso “batúntúki” pe bongo na bongo, ndenge wana; soki bokoki koyikela yango mpiko te, bozali bana makango, kasi bana na Nzambe te. Biblia elobi bongo.

²⁴¹ Bobenga ngai “motúntúki,” soki bolingi. Bobenga ngai nkombo nyonso oyo bolingi. Na ntango nyonso motema na ngai ezali sembo na miso na Nzambe, pe lobiko na ngai elongobani na Biblia ya Nzambe, nakokoba kotambola kaka na ngambo wana. Iyo, misie. Tala makambo biso tondimaka. Tala Lingomba na Nzambe na bomoi, oyo euti na likindo te. Euti na mwa makanisi moko boye ya maye ya moto te. Euti na Solo oyo emonisami ete Yesu Klisto azali Mwana na Nzambe, na mobimba.

²⁴² Soki nyonso oyo nazalaki na yango, ezalaki bobele makanisi ya maye, mpo ete lingomba Batiste to lingomba Metodiste bateyaki ngai ete ezali likambo *boye to boye*; ntango nakoyoka Biblia oyo, soki Biblia. . . Soki nazuaki libatishi na nkombo na “Tata, Mwana, pe Molimo Mosantu,” pe natangi Biblia oyo, pe motei moko ayebisa ngai ete moto moko te na kati na Biblia azuaki libatishi soki bobele na Nkombo na Yesu Klisto, pe natangi yango pe namoni yango ete ezali Solo, nalingaki kokende na mai na mbangu na ngai nyonso. Iyo, misie.

²⁴³ Soki moto moko ayebisi ngai ete—ete Yesu Klisto azalaki mobikisi monene ya bokono; kasi lingomba na ngai eyebisi ngai ete “Mikolo na bikamwa esilá koleka,” pe nazali na mposa ya

lobiko na nzoto; nalingaki kopota na etumbelo na mbangu na ngai nyonso, mpo nabikisama. Na ntembe te.

²⁴⁴ Soki nazalaki motei, pe nazalaki na—na mwasi motei moko na etumbelo na ngai, pe natangi na Biblia oyo pe namoni ete mwasi asengeli koteya te, nalingaki kolongola ye wana, ata soki bakosilisa ngai lomposo.

²⁴⁵ Pe bozali komikanisela, afandaki kuna na suka, wana esika Ndeko mwasi Wright afandi, na mpokwa moko boye, mwasi moko alingaki kobwaka ngai libanda mpo nasalaki eloko moko ndenge wana. Iyo, misie. Nalobaki: “Yo okokota na losambo na ngai te na mwa. . .” Ezalaki ntango basi bazalaki kolata, to bazalaki na ba-robe wana oyo etikaka kingo na mapeka nyonso libanda, ná bilamba wana ya mabe, pe penepene nzoto na bango mobimba ezalaki polele. Nalobaki: “Soki mokolo moko bakoti na losambo na ngai, na ntembe te, nakobimisa bango.” Pe mwa elenge mwasi moko oyo motó etambolá azalaki pembeni awa, aumelaki kokufa te nsima na yango; pe asengaki babenga ngai nokinoki, azalaki kobunda na liwa. Azalaki elenge mwasi ya Katoliko, apusanaki kuna pe amifandisaki boye. Natalaki na suka, pe natalaki ye malamu, ntango nafandaki awa, pe bazalaki koyemba nzembo. Nalongolaki kazaka na ngai, nakendeki kuna na suka, pe natiaki yango likolo na mapeka na ye. Nalobaki: “Madame, soki olingi koyoka ngai ntango nazali koteya, ekozala malamu olata kazaka oyo ntango ozali na kati na losambo na Nzambe.” Bomoni? Ya solo.

²⁴⁶ Abimaki na kotútáká makolo, pe atombolaki mbebo na ye likolo. Abimaki na ndako. Alobaki: “Soki losambo ezali nde oyo azali na yango wana, nakotika ngombe na ngai ezala na losambo ya ndenge wana te.”

Nalobaki: “Komitungisa te, akozua yango te.”

²⁴⁷ Na nsima, tozalaki na liyangani na héma, babengaki ngai ntango azalaki kobunda na liwa. Mpasi ya motema ebwakaki ye, pe azalaki kobunda na liwa. Mobali na ye ayaki. Alobaki: “Yaka noki!” Pe nazalaki mpenza na katikati ya liyangani. Azalaki mobali monene pe molai, atelemaki wana na ekuke, azalaki kozela ngai. Pe napotaki mbangu mpenza. . .

²⁴⁸ Nazuaki motuka na ngai pe nakendeki kuna na mbangu. Wana nazalaki komata, nakutanaki na lifulume wana ya mwasi ya mokóló, kuna, oyo azali kofanda na Howard Park kino lelo. Alobaki: “Mokengeli, ntina ete oya ezali te.” Eleki soki mibu ntuku mibale, ntango mosusu koleka mwa moke. Alobaki: “Akufi.” Alobaki: “Akufi eleki soki miniti misato.” Alobaki: “Azalaki kobelesa yo na makasi na ye nyonso.” Alobaki: “Nazali na likambo ya koyebisa yo.”

Nalobaki: “Likambo nini?”

²⁴⁹ Alobaki: “Motei oyo, nalobelaki ye likambo wana, yebisa ye: ‘Alimbisa ngai, palado.’”

²⁵⁰ Nakendeki kuna kotala ye. Mwasi kitoko; pe amonaki mpasi mingi mpenza. Pe mwa matónó ya moindo ezalaki zongazonga na zólo na ye; mwasi moko kitoko mpenza. Pe matónó wana ya moindo, ezalaki komonana lokola elingi kobima. Pe mbuma ya miso na ye ebimaki mobimba na bisika na yango, pe ebalukaki mwa ndambo na nsima. Na ntembe te, asumbaki pe asubaki, pe mbeto mobimba ezalaki kolumba nsolo, boye.

²⁵¹ Pe mobali na ye azalaki kotala ngai, alobi: “Ndeko Branham, bondela, mpo azalaki na mposa ámona yo.”

Nalobaki: “Libondeli mpo na ye sikawa, ezali na ntina te.”

²⁵² “Nzete ekweyaka, na ngambo etengami.” Bomoni? “Komikosa te; basakanaka na Nzambe te. Oyo moto akolona, yango nde akobuka.”

²⁵³ Bomoni esika ekómi? Sikawa, eloko nini esalemaki? Botala mwasi oyo akosala likambo yango. Botala basi oyo babikaki kalakala, mwasi wana mobini ya mizíki ya mokili, mwana na ye ya mwasi azalaki nani? Mwasi na pite. Mwasi na pite, mwana na ye ya mwasi azalaki nani? Elenge mwasi ya rock and roll. Mwana na ye ya mwasi akozala nani? Ah! Likambo nini?

Bomoni momboto ya moyengebeni?

²⁵⁴ Bomitala, bino ba-Batiste. Bozonga nsima mwa moke. Bozonga epai na John Smith, mobandisi na bino, bino ba-Batiste. Wana azalaki kobondela mingi mpo na masumu na bato, na lolenge ete, azalaki kolela pe kobondela mpo na bato kino ete miso na ye ezalaki kovimba pe kokangama, pe na mesa, mwasi na ye asengelaki koleisa ye bilei ya ntongo.

²⁵⁵ Pe bino ba-Methodiste, awa, ná mayaka na zólo pe na matoi, pe mpo na zabolo, bokómi lokola matiti oyo eliaka nzinzi; pe bozali kobima, bolati ba-kupé, pe biloko ya ndenge wana! Nzoka nde, moto ya mpiko John Wesley, moko na bampaka ya lingomba Methodiste, liboso ete akufa, na mibu ntuku mwambe na mitano, ateyaki liteya mokuse ya mibu minei. . .ngonga minei. Basengelaki komema ye nde komema mpo batia ye na eteyelo. Pe maloba na ye ya suka yango oyo. Alobaki: “Ngai natungisami mingi na bizaleli ya lingomba Methodiste.” Alobaki: “Ata bana basi ya lingomba Methodiste bakómi kolata mpete ya wolo na misapi na bango.” Bongo sikawa, alingaki koloba nini, ntango bazali kolata ba-kupé, pe bazali koyemba na korale?

²⁵⁶ Bozalaki kotambola malamú. Likambo nini ekómeli bino? Bozali kosala makambo lokola mama na bino. Ezali mpenza bongo.

²⁵⁷ Yango wana tolingi eloko moko te ya bibongiseli wana oyo ezali nzinga-nzinga na likambo oyo, to ezui nkombo moko awa: “Biso ba-Methodiste. Biso ba-Batiste.” Biso tozali nde baoyo ya Klisto, esili. Botika yango bongo, pe bozala bansomi.

258 Sikawa, bomoni momboto na nyoka? Elingaki kozala na motuya nini mpo na mwasi ya ndenge wana lelo? Elingaki kosala nini? Likambo nini? Basi bazali kaka kokende liboso, bamoko nsima na bamosusu. Bazongisi ba-Batiste nsima, bazongisi ba-Metodiste nsima, bazongisi ba-Presbyterien nsima. Basali nini? Bango nyonso bazongi nsima, lokola mama na bango, mobangé ya mwasi wana ya pite. Bango nyonso bango wana, bazali kosala kaka pite yango. “Ee, bokeseni moko te ezali. Bazindisaki bango na mai. Bamwangiselaki bango mai. Bango, bayei koyambola masumu na bango. Batosaki sanza na bango moye motoba ya ekila; bamelaki masanga mingi te na ntango yango, pe nyonso. Bazali bandimi ya malamau. Bafutaka malamau. . .” Hólála! Yango ezali na likambo moko te, na mbuma na Molimo.

259 Mbuma na Molimo ezali “kondima,” kondima ete Yesu Klisto azali ndenge moko lobi, lelo pe libela; “bolingo” epai na bandeko; “esengo, kimia, motema pete, bolamu, boboto, kokanga motema, bopolo, komipekisa.” Tala biloko yango, mbuma na Molimo.

260 Pe tozua mobali moko: “Ee, ye—ye azali kobika bomoi malamau na bazalani na ye.” Esau pe azalaki bongo.

261 Esau asalaki moto moko mabe soki moke te, pe Esau azalaki ya zabolo; kasi Yakobo, oyo autaki na libumu yango moko, azalaki ya Nzambe. Momboto ya zabolo; Momboto ya mwasi, Momboto na Nzambe alekaki na nzela wana.

262 Bongo, bomoni, nyonso eyei kosuka nde na yango, pe eloko nini etikali na mokili lelo? Nakoloba yango makasi mpenza, mpo bososola yango malamau, pe na nsima tokobanda kolamuka, na liyangani oyo ekoya. Ekómi na lolenge moko boye. Pe, bolimbisa ngai, nazali koloba yango mpo na kotuka te. Nazali koloba yango mpo na kozala moto mabe te. Ekómi na mosanda moko ete, ezali etonga monene ya kosambela ya bana makango, bana ya ekobo. Makebisi na ngai ya suka yango oyo. Ekómi mpenza-mpenza nde wana. Boyebi ete ezali solo. Ekómi na mosanda moko ete, ezali bobele likambo ya kosangana na lingomba pe ya kokóma bandimi ya lingomba, “bazali na lolenge na kosambela, nde bazali koangana Nguya na yango,” na lolenge ete ekómi etonga moko ya basambeli, ya bana ya ekobo. Ezali mpenza yango.

263 Eloko nini etikali, oyo elandi? Fusée moko etiami kuna na likolo, mingi kati na yango, ba-bombe ya cobalt pe nyonso mosusu. Ezali kozela bobele ete ntango yango ekoka. Pe kobomama na móto ekozala, ndenge esalemaki na mai.

264 Pe, baninga na ngai, ata ozali kosala nini, soki ozali Moklisto pe Nzambe azali na motema na yo, pe oyebi ete olongwe na kufa pe okoti na Bomo, osengelaki kozala moto ya esengo koleka na mokili. Ntango Molimo Mosantu kati na yo. . .

265 Ntango, Biblia elobi: “Yesu Klisto ndenge moko lobi, lelo pe libela.”

266 Bibongiseli balobi: “Kasi tondimaka ete bikamwa esilá koleka.”

267 Molimo Mosantu alobi: “Amen. Yesu Klisto azali ndenge moko lobi, lelo pe libela. Ezala se bongo.”

268 Soki Biblia elobi: “Bobongola mitema, pe bobatisama moko moko na Nkombo na Yesu Klisto mpo na kolimbisama na masumu na bino, pe bokozua Molimo Mosantu. Mpo ete elaka yango ezali mpo na bino, ná bana na bino, mpo na bato na Mabota, na bango nyonso bazali mosika, baoyo nyonso Nkolo Nzambe na biso—baoyo nyonso Nkolo Nzambe na biso akobianga.” Bomoni? (Ezali te, “baoyo nyonso ba-Methodiste bakobianga, ba-Batiste bakobianga.”) Kasi, “Baoyo nyonso Nkolo Nzambe na biso akobianga, bakoza Molimo Mosantu oyo, pe bakobatisama na Nkombo na Yesu Klisto.” Yango nde oyo Biblia elobi.

Ntango esimbi motema na yo, okoloba: “Amen.”

Lingomba elobaki: “Oh, ezali na bokeseni moko te.”

269 Kasi Molimo Mosantu oyo kati na yo, Akoloba “amen” na Liloba na Ye. “Moto akobika bobele na mapa te, kasi na Maloba oyo ebimaka na monoko na Nzambe.” Yango wana.

270 Nalingi ete bolakisa ngai bobele eteni ya Likomi moko, oyo balóbá ete mbuma nde ebandisaki makambo nyonso oyo, totala. Nalingi bolakisa ngai ete baliaki mbuma. Ngai nalakisi bino ete Kaina, kuna, azalaki kaka na makanisi wana, pe momboto na ye bazali kokanisa kaka bongo.

271 Kasi emoniseli ya molimo ya Nzambe ezali kotalisa polele, na nzela na Biblia, ete ezalaki nde koyebana nzoto kati na mobali ná mwasi, oyo ebukaki mobeko. Wana nde esika bato minene na bino bautaki. Wana nde esika lisumu na bino eutaki. Wana nde esika libebi na bino eutaki. Eutaki nde kuna.

272 Sikawa, botala, kati na nyonso oyo—oyo, botala, nyo—nyoka azalaki na mayele mingi koleka. Momboto na ye ezalaka ntango nyonso na mayele mingi koleka. Pe nalingaki komata na eteyelo oyo, nasimba mikró oyo na loboko na ngai, [Ndeko Branham azali koningisa mikró yango—N.D.E.], pe natelema awa na eteyelo, pe naloba boye. Pe, lelo oyo, wapi bato na bino ya mayele mingi? Mokengeli na bino oyo akendeki koluka boyebi mingi ya bongo, pe ateleme kuna; azali mokengeli ya mangomba oyo eleki minene ya ekólo oyo, pe nyonso wana. Momboto na nyoka ezali wapi? Na bisika minene ya monzele pe ya mayele ndenge wana; bato ya mayele pe ya boyebi mingi. Kuna nde esika yango ezali. Yango ezunami nde kuna.

273 “Na nzela na nguya te, na nzela na makasi te, kasi na Molimo na Ngai, Yawe alobi bongo.” Bomoni? Wana nde esika bino . . .

274 Na bongo, kamata ndeko mobali moko ya mpiko oyo ateleme kuna na litúmu, azali kolela na mai ya miso, pe ntango mosusu

atelempi kuna, azali kobeta mwa gidalé moko boye, na kolobaka: “Ndeko mobali, yaka, kokutana na Nkolo!”

275 Mokengeki moko aleki wana, alobi: “Ah, ngai nakotika losambo na ngai te. . . Oh, ngai nakokende te, nakopesa nzela te na baoyo ya ngai. . . ngai nakolinga te ete Liddy ná Johnny ná bamosusu wana bamona ngai na esika ya boye.” Kende kuna, momboto na zabolo, ozali kokende na esika na yo ya Seko, ata boni. Ya solo. Nalingaki koloba liloba mosusu wana, pe koloba “bana ya ekobo,” pe ekoki mpenza kozala yango. Mpamba te, bomoni, bino. . .

276 “Moto akoki koya epai na Ngai te bobele soki Tata na Ngai abendi ye. Moto nyonso akoya epai na Ngai, Nakosekwisa ye na mokolo na suka. Eloko moko te ekobunga. Nasimbi yango. Nakobatela yango. Moto moko te akoki kosala yango, soki bobele Oyo.”

277 Nyonso etongami likolo na Ye. Okoki te koloba: “Nasalaki likambo moko.” Ngolu na Nzambe nde esali nyonso wana. Bongo, ezali makambo oyo ngai nasali te. Nazalaki ata na eloko ya kosala te; yo pe te. Yo okokaki ata na eloko moko te. Nzambe moto asalaki nyonso wana. Yo otombolaki ata mosapi te na nyonso wana. Yo olobaki te ete: “Ee, ngai nabotami na libota malamau. Nasalaki likambo *boye*.” Yango ezali ata na ntina moko te. Nzambe Moto Asalaki yango; mawa na Nzambe.

278 Bongo, nayoki mawa na motema, ngonga ya zomi na moko ebeti naino te, kasi nakosukisa ata bongo. Bomoni?

279 Bato boni basosoli ete Biblia ezali koloba ete makambo oyo ezali Solo; bino bato ya Branham Tabernacle, mpenzampenza? [Losambo balobi: “Amen.”—N.D.E.] Oyo wana, ezali penepene moko likolo na zomi na motoba na oyo biso toteyaka pe tondimaka. Kasi, bomikanisela, nakoki koloba boye, mpo na bino bato oyo boyei koya, bino bato oyo boyaka awa te lokola bandimi. Ndenge biso tondimaka yango, ezali ete *Oyo*, ezali Biblia, pe Biblia ezali Bosolo na Nzambe.

280 Pe biso tondimaka ete, na Kondimana na Kala, kuna, bazalaki na lolenge moko ya koyeba makambo ya solo ná ya solo te.

281 Sikawa, biso nyonso toyebi ete bazalaki na mobeko oyo ekomami. Bato boni bayebi yango? Etumbu, mi—mibeko ezalaki kati na sanduku na mibeko, pe bongo na bongo; malamau, pe etumbu likolo na mibeko yango. Elobamaki: “Sala ekobo te. Moto oyo akosala ekobo akobomama na mabanga.” Bomoni? Ezalaki mo—mobeko, pe etumbu likolo na mobeko yango. Sikawa, sanduku na mibeko etiamaki *boye*; mibeko ezalaki kuna na kati, pe bitumbu mpo na mibeko yango ezalaki kati na mwa mabanga pembeni na sanduku yango. Soki moto akei kuna, ete asalaki ekobo; azalaki kotia loboko na ye kuna na kati mpo nakotala eloko mobeko elobi, “boboma ye na mabanga.”

Bazalaki komema ye libanda mbala moko, pe bazalaki koboma ye na mabanga. Yango ezalaki etumbu mpo na mobeko wana.

²⁸² Bongo, bazalaki na ndenge mosusu mibale ya koyeba makambo. Ezalaka ntango nyonso misato, mpo na kondimisama. Bazalaki na lolenge mosusu ya koyeba makambo, pe ezalaki to na nzela ya mosakoli to ya moloti ndoto. Bato boni bayebi yango? “Soko moto azali na kati na bino oyo azali moto na molimo, to mosakoli, Ngai Yawe, Nakomimonisa epai na ye kati na ndoto, pe Nakosolola na ye kati na bimononeli.” Ya solo. Na bongo, azalaki moto oyo asakolaka.

²⁸³ Bongo, soki moto moko ayei pe alobi: “Oh, aleluia, nazui yango! Nazali kosakola sikawa na Nkombo na Yawe. Nazui emoniseli yango.” Bazalaki kotika yango eleka ndenge wana te, ndenge bino bosalaka. Bazalaki kotala yango liboso, na nzela na Nzambe.

²⁸⁴ Sikawa, likolo na libenga ya ntolo na Alona, eloko moko ezalaki oyo babengaka Urim Tumim. Bato boni basila koyoka nkombo wana? Ezalaki nini? Ezalaki mabanga zomi na mibale, motoba na ngambo moko na moko, ya bankóko zomi na mibale; yasipi, Yuda, pe bongo na bongo, ndenge wana, mabanga zomi na mibale. Na bongo, bazalaki koya na mosakoli yango, to moloti ndoto yango, pe bazalaki kotia libenga ya ntolo wana likolo, pe bazalaki kotelemisa ye liboso wana. Pe bazalaki koloba: “Sikawa sakola pe pesa esakweli na yo.”

“Yawe asololi na ngai pe Alobeli ngai likambo—likambo boye na boye.”

²⁸⁵ Ata boni likambo yango emonanaki lokola solo, ekokaki komonana lokola ezali solo mpenza; kasi soki ba-pole wana, esangani te pe esali langi ya monama te na bisika nyonso, Urim Tumim, ba-pole wana ezalaki kosangana esika moko, oyo aleki likolo kati na mosala, mpo na kotatola. Bomoni, Nzambe atatolaka ntango nyonso Liloba na Ye. Bomoni? Pe soki ba-pole wana ya bonzambe epeli likolo kuna te, na ntango wana, ata soki emonanaki lokola solo ndenge nini, ezalaki lokuta.

²⁸⁶ Soki moloti ndoto alobi: “Naloti ndoto moko, pe ndoto yango elobi ete ‘esengeli ete Yisalaele balongwa awa pe bakende na esika boye, mpo ete Basulia bakokota na ngambo *oyo* pe bakozinga bango.” Bazalaki komema moloti ndoto wana kuna; azalaki koloba ndoto na ye. Soki ba-pole yango epeli bisika nyonso wana te, akwei na likambo, ata ndenge nini. . . Ata soki Basulia basilaki kokóma kuna, mpo na etumba, akwei na likambo. Te, misie. Bango, esengelaki mpenza ete yango etalisama polele na nzela na Urim Tumim.

²⁸⁷ Sikawa, moto nyonso ayebi ete makambo ya bonganga Nzambe ya kala esilá, balongolá yango, pe Urim Tumim pe esilá elongo na yango. Toyebi yango, boye te? [Losambo balobi: “Amen.”—N.D.E.]

288 Pe makambo ya bonganga Nzambe ya sika eyaki. Ezali nini? Boye tozali na Urim Tumim lelo? Iyo, misie. Liloba na Nzambe! Iyo, misie. Yango *Oyo*. Moto nyonso, soki azali na emoniseli moko boye, to alobi likambo moko boye, to malakisi moko oyo ekokani te pe elo- . . . pe elongobani te na Biblia oyo, ebandeli kino na suka ya Makomi oyo mobimba, akwei na likambo. Ata soki azali na ebongiseli nini, azali moto malamumu ndenge nini, azali na boyebi ndenge nini, azali na mayele ya mokanda ndenge nini; akwei na likambo.

289 Pe moto nyonso, ntango azali kolobela yo makambo wana, oyo toteyaki awa na losambo, pe alobeli yo ete “soki bamwangiseli yo mai, ezali mabe te,” alobeli yo lokuta. Yango ekopelisa Urim Tumim te. Ntango alobeli yo ete “kosopa mai, ezali mabe te,” alobeli yo lokuta. Alobeli yo ete: “Ozua libatishi na ‘nkombo na Tata, Mwana, Molimo Mosantu’, ezali mabe te,” alobeli yo lokuta. Soki alobeli yo: “Mikolo na bikamwa esilá koleka,” alobeli yo lokuta. Soki alobeli yo: “Ezali mabe te mpo na basi koteya,” alobeli yo lokuta. Soki alobeli yo: “Ezali malamumu ete okende na yo liboso pe otikala kaka na ebongiseli na yo,” alobeli yo lokuta. Yango ekopelisa Urim Tumim te. Pe makambo zomi na mibale oyo bakotisaki, kati na mwasi ya kala wana “MAMA NA PITE,” pe ekatisaki kuna, pe yango wana biso tozali mosika na bibongiseli.

290 Bisu tolingaka bandeko na biso ya mibali pe ya basi oyo bazali kuna na bibongiseli wana. Kasi ezali te kokende koloba: “Ngai nazali Metodiste,” nde ekokómisa yo Moklisto, na ndenge nazali komona. Ozali Moklisto nde mpo ete obotami na Molimo na Nzambe. Osengeli te kozala Metodiste to Batiste. Osengeli te kozala kati na moko to mosusu. Osengeli bobele kobotama na Molimo na Nzambe. Bondimi yango? [Losambo balobi: “Amen.”—N.D.E.]

291 Likolo na mibóko oyo, soki moto moko azali awa oyo alingi kozala na boyokani pe kokota na lisanga na kosambela oyo, pe alingi ko—alingi kozindisama na mai, kobatisama na Nkombo na Yesu Klisto, liziba ya mai yango oyo. Bakopesa libatishi, nsima na mwa ntango moke.

292 Soki bato bazali, mingi awa, moto oyo alingi koya, na lolenge mosusu nyonso? Tozali awa. Ya solo.

293 Sikawa, biso—bisu tozalaka na kalati ya bandimi te; boya kaka awa, na losambo oyo. Bisu tondimaka ete Klisto azali na lingomba Metodiste, na lingomba Batiste, na lingomba Presbyterien. Azali na bandimi na kati na mangomba wana nyonso. Pe eloko nini ezangi lelo; ezali nde bisakweli ya lokuta oyo ezali kokomisa makambo wana, malakisi ya mangomba wana, oyo ekesani mpenza na Biblia.

294 Sikawa, soki moto moko alakisi ngai Yango polele mpenza, na ntembe te nakokende ngai moko . . . Nandimi ete Molimo na

Nzambe ezali na ndenge ekoki kati na ngai, mpo nalukaluka kati na Biblia oyo pe náya kobongisa yango. Soki násepelaka bobele kokende kopesa batei mbote ya loboko, pe kotia nkombo na ngai kati na kayé monene, pe nakoba kozala na koyina pe na mabe kati na motema na ngai, pe nakoba kozala na zuwa, pe molimo ya kowelana, pe nakoba kozanga kondima ete Yesu Klisto azali mobikisi monene ya bokono, pe bongo na bongo ndenge wana, nalingaki kokende komitia na molongo na Nzambe, kaka sikawa. Nandimi mpenza ete nalingaki kosala yango. Na—nalingaki mpenza kozala sembo mpo na yango. Nalingaki kokende komitia na molongo na Nzambe. Soki natiaki elikia bobele mpo ete nazali Batiste to Methodiste, nalingaki kokende kotia Boklisto kati na motema na ngai. Nalingaki kosala yango. Iyo, misie.

²⁹⁵ Sikawa bobosana te kolamuka oyo ezali koya, oyo ekobanda, soki Nkolo alingi, na mpokwa ya mokolo ya misato oyo ekoya. Etongami likolo na mibóko oyo.

²⁹⁶ Boyoka, baninga na ngai, Nzambe ya bomoi pe ya solo azali. Ezali ya solo. Yesu Klisto azali Mwana na Nzambe. Molimo Mosantu azali kati na Lingomba lelo.

²⁹⁷ Sikawa, soki ezalaki bobele moto nde ayebisaki ngai makambo oyo, nalingaki kozala na makoki ya kobeta ntembe na yango. Kasi, boyoka. Mokolo moko, kuna, ntango nazalaki elenge, natelemaki na nse na nzete moko; namonaki Ye. Nayokaki Ye. Asololaki na ngai, Alobaki: “Zala mosika na basi wana ya mbindo. Zala mosika na makaya. Zala mosika na makambo ya kotuka, na komela masanga, pe na biloko nyonso wana. Nazali na mosala moko mpo na yo ntango okokóla.” Nayebi ete Azali Nzambe ya solo pe ya bomoi, oyo Azali kobatela Liloba na Ye.

²⁹⁸ Ntango nakómaki mwa mokólo, ndenge Ayaki epai na ngai, ndenge Asololaki na ngai! Ndenge namonaki Ye kuna, lokola nzete ekopela móto, na kati na Móto wana oyo ezalaki kozunguluka kuna! Ndenge namonaki Ye koloba pe kosakola mpenza-mpenza makambo oyo elingaki kosalema; mbala na mbala, na ndenge mpenza ya kobonga be, ndenge wana.

²⁹⁹ Bobele Ye oyo alobaki makambo wana oyo ebongi be ndenge wana, ezali bobele Ye Oyo apesi ngai pemela ete nateya Biblia oyo ndenge mpenza nazali koteya Yango. Ya solo. Bongo, Yango euti epai na Nzambe. Mpo na ngai, ezali Nzambe na Nguya nyonso, pe Azali ndenge moko lobi, lelo pe libela.

³⁰⁰ Yesu alobaki: “Nauti epai na Tata, pe Nazali kokende epai na Tata.” Ntango Ayaki. . .

³⁰¹ Ntango Azalaki Nzambe kati na biliki, Azalaki Pole oyo ezalaki kopela móto. Pe bato boni bayebi yango? [Losambo balobi: “Amen.”—N.D.E.] Azalaki Pole oyo ezalaki kopela móto, Likonzi na Móto.

³⁰² Pe Ayaki awa na mokili, pe Alobaki: “Nauti epai na Tata, pe Nazali kokende. . . Nauti epai na Nzambe, pe Nazali kozonga epai na Nzambe.”

³⁰³ Ntango Akufaki, Akundamaki, pe Asekwaki, pe Polo, na nzela na Damaseke, akutanaki na Ye lisusu, Azalaki Nani? [Moto moko alobi: “Likonzi na Móto.”—N.D.E.] Azali kaka Likonzi na Móto. Iyo, misie.

³⁰⁴ Asalaki nini ntango Azalaki awa na mokili? Asalaki nini ntango Akutanaki na Polo? Ndenge nini Atindaki ye? Atindaki ye epai na mosakoli oyo ayebisaki ye ndenge nini ya kozua libatisi, ayebisaki ye eloko nini asala; atielaki ye maboko pe abikisamaki, ayebisaki ye ete amonaki emononeli.

³⁰⁵ Kaka Yesu wana azali awa lelo, Azali kosala kaka misala yango, kaka Likonzi na Móto yango, koteya kaka makambo yango, pe kotatola yango na Liloba na Ye, na bilembo pe na bikamwa. Nazali na esengo mingi ya kozala Moklisto, nayebi eloko nini nasala te. Nazali na esengo mpo ete ozali Moklisto.

³⁰⁶ Pe bino, bato ya Losambo oyo, nayebisaki bino ete tokobongola nkombo wana. Ezali malamau te ete ézala Branham Tabernacle. Oyo, ezali bobele moto, bomoni. Tokobongola nkombo na yango, tokopesa yango nkombo mosusu. Tokotala likambo yango, nsima na mwa ntango. Nalingi ete ézala bobele li—lingomba na Nzambe na bomoi. Nalingi te ézala Metodiste, Batiste, Presbyterien, Pentekotiste. Ngai. . .

³⁰⁷ Bato wana nyonso, nalingi bango na motema na ngai mobimba. Mpo nayebi te soki songólo azali nani. Nakoki te koyebisa bino yango. Nasengeli bobele koteya Liloba. Nazali kobwaka monyama pe nazali kobenda. Magorodo ezali, mapúlututú ya mai ezali, ba-nyoka ezali, mbisi pe ezali. Nzambe nde akozua mokano mpo na yango. Ngai nazali kaka kobenda monyama, nazali kaka koteya Liloba pe nazali kobenda, na koloba: “Bango wana, Nkolo, nzinga-nzinga na etumbelo. Yo Oyebi baoyo ya Yo; Yo oyebaki bango longwa na kozalisama. Ngai nayebi te soki songólo azali nani. Yo nde oyebi, na bongongo ezali likambo na Yo, Nkolo. Yango nde nyonso nakokaki kosala. Nakolongwa awa, pe nakokende kobwaka monyama bipai mosusu sikawa, mpo nakotisa etonga mosusu. Yango nde nyonso oyo nakoki kosala.” Malamau.

Oh, nazali na mposa ya kokoba mobembo,
 Nazali na mposa ya kokoba mobembo;
 Ndako na ngai ya Lola etondi na pole pe
 kitoko,
 Nazali na mposa ya kokoba mobembo.

³⁰⁸ Sikawa bobosana te, baoyo nyonso bazali na mposa ya kosolola na ngai, bobenga bobele Misie Mercier awa, to na BUTler 2-1519. Tokozala na esengo ya komona bino. Soki ozali na balingami oyo bazali koya, oyo basengeli kozonga mbangu-

mbangu ntango tokozala na mayangani ya kolamuka . . . Sikawa, kobanda na mpokwa ya lelo, nakokende mpo názala ngai moko, pe nakozala awa te kati na mikolo mibale, nakozala kuna ngai moko.

³⁰⁹ Nakokota kaka kuna pe nabandi koyekola, boye: “Nkolo, Ozali pene na ngai. Nayebi ete Ozali awa. Pe Liloba na Yo elobi ete Yo okobeleme na baoyo bakobeleme na Yo.” Nakokoba kobondela pe kosenzela kino ete námona Likonzi na Móto yango ebandi koningana. Na ntango wana nde nayebi ete ebelemi. Na nsima naye na eteyelo mpo na liyangani ya lobiko na nzoto, mpo na kobondela, pe kosala eloko nakoki kosala mpo na kosunga babeli pe bato na mawa.

³¹⁰ Tozali kosepela mpenza na boboto na bino mingi. Pe ntango bokoya, boya na kondima, pe tozali kolikia ete tokozala na liyangani moko ya nkembo. Nalingi koloba ete . . .

³¹¹ Ndeko Jefferies, azali awa na mpokwa oyo? Tolingi kopesa matondi na Ndeko Jefferies pe na mosala na ye. Nakanisi ete azongi na bisanga, pe nyonso.

³¹² Nazali na esengo ya komona Ndeko mwasi Wright, ná bandeko mingi na kati na bino.

³¹³ Pe namoni avoka Robertson awa, kaka sikawa, auti kokota sikawa. Nalingi kopesa ye longonia mpo na—mpo na liteya na ye ya mokolo wana. Moto moko te alobaki soki ezalaki nani. Esalaki nsoni. Ateyaki liteya kitoko mpenza likolo na esakweli, eloko moko lokola oyo natei na mpokwa oyo.

³¹⁴ Pe na nsima, motei mosusu pe azalaki awa na ntongo ya lelo, to na mpokwa eleki, Ndeko Smith, ya lingomba Metodiste . . . to ya eglise de Dieu, oyo ya pembeni awa. Nayebi te soki azali awa to azali te, na mpokwa oyo. Soki otelemi na nsima na eteyelo oyo, pe otali kuna na suka boye, ezali mpasi mpo osala bokeseni; ezali semba, bomoni, pe okoki kosala bokeseni te. Soki ozali awa, Ndeko Smith, tosepelaka na yo mingi.

³¹⁵ Pe, oyo afandi awa, ezali te ndeko mobali wana ya Georgie, afandi kaka na nsima awa, pembeni na Ndeko Collins? [Ndeko Neville alobi: “Iyo.”—N.D.E.] Tozali na esengo ya komona yo lisusu awa na mpokwa oyo, ndeko.

³¹⁶ Ná bamosusu nyonso, bino nyonso, bomiyebi moko na moko banani bozali.

³¹⁷ Nandimi ete oyo ezali ndeko mwasi ná ndeko mobali oyo bakendeke kobondela mpo na elenge mwasi yango, mokolo wana, kaka awa, monganga moko afandi na ngambo oyo. Nkolo apambola yo, monganga.

³¹⁸ Sikawa, nasengi bino, bobeta libaku te mpo na ngai, bino batei ná bandeko mibali, na ntina na lolenge na ngai ya kobeta nsete likolo na likambo yango na makasi na ngai nyonso. Oyo ezali Losambo na biso. Yango ezali makambo oyo biso

tondimaka, pe tolingi mpenza kondimisa Yango na Liloba oyo, pe koningisa makambo yango na Liloba. Bongo, soki mokolo moko obimi na molongo, tokoya lisusu koyebisa yo: “Yo oyebaki yango malamamu. Yango Oyo na kati na bande.” Omoni? Yango wana. “Yango Oyo na kati na bande.”

³¹⁹ Tozali lisusu na makambo mingi koleka oyo tosengelaki kobakisa likolo na yango, Leo. Kasi, kasi bino. . . Bosila kozua yango. Bokangama na Yango makasi, pe tokotala Oyo etikali nsima na mwa ntango. Ezali lokola mobali wana oyo azalaki kolia mbuma wana melon, alobaki: “Ezalaki na elengi mingi, kasi mosusu ezali.” Bongo, tozali na Yango mingi lisusu, oyo ekoya nsima.

³²⁰ Nkolo apambola bino, mingi mpenza, kuna. Na ntango biso. . . Tokosala mosala na biso ya kobatisa bato sika-sikawa. Ezali bongo, Ndeko Neville? [Ndeko Neville alobi: “Iyo, nabanzi ezali bongo.”—N.D.E.] Moto moko azali awa oyo alingi kozua libatizi sika-sikawa? Bisu tozali na ntina te ya koyeba soki ozali nani; bisu toyeyi—bisu toyeyi awa nde mpo na kobatisa bato. Botombola maboko, bino baoyo bosengeli kozua libatizi. Moto moko, nabanzi ezalaki. . . Mwasi moko ye oyo, awa. Pe moto mosusu azali? Sikawa, tozali na bilamba awa mpo na bango nyonso, mibali pe basi.

³²¹ Bongo, tolobi te ete: “Olongwa na lingomba Batiste. Olongwa na lingomba Metodiste.” Tolobi bongo te. Zonga pe kende kaka na lingomba na yo. Kasi soki naino ozuá libatizi yengebene na Makomi te, na Nkombo na Nkolo Yesu. . . Bobele na Nkombo na “Yesu” te, kuna. Na Nkombo na “Nkolo Yesu Klisto,” Makomi nde yango wana. Ozuaki libatizi mabe.

³²² Naboi na ngai mindondo ntango nakokóma na ebale. Nalingi kosala nyonso oyo nakoki kosala mpo nzela ézala polele, ntango nakozala na tiké na ngai na maboko, bomoni, mpo nalingi ete nazala na kati na masuwa na ntango yango. Nakopesa yo ntoli ete osala bobele bongo.

³²³ Zonga na losambo na yo. Etali yo, ezali likambo na yo na Nzambe. Nyonso oyo nakoki koyebisa yo yango wana.

³²⁴ Kasi moto moko te kati na Makomi azuá libatizi na lolenge mosusu soki bobele na Nkombo na “Nkolo Yesu Klisto.” Pe bato oyo babatisamaki, bazuaki motindo epai na Santu Polo, oyo alobaki: “Soko Mwanje moko ateyi eloko mosusu, tika ete alakelama mabe.” Apesaki bango motindo ete baya kobatisama mbala ya mibale, lisusu, na Nkombo na “Nkolo Yesu Klisto.” Ezali solo. Pe asalaki yango. Pe eloko asalaki, apesaki biso etinda ya kosala yango; pe yango nde oyo tokosala, soki Nzambe alingi.

Bisu tondimaka kosukola makáká. Tondimaka elambo.

³²⁵ Tondimaka Boyei na mibale ya Klisto, bakomonana polele, nzoto mpenza ya Nkolo; Molimo te, kasi nzoto mpenza ya Nkolo Yesu ekoya lisusu na nkembo.

326 Bisu tondimaka lisekwa ya nzoto ya bakufi, mpo na kozua nzoto moko, ya kala pe ya konúna te lokola oyo tokendeke na yango na malíta; kasi nzoto ya sika, kati na esengo monene ya bolenge, mpo na kobika libela.

327 Bisu tondimaka ete molimo ekufaka te, kozanga ntembe. Tondimaka ete lolenge ya Bomoï na Seko ezali bobele moko, pe Bomoï wana nde oyo okozua epai na Yesu Klisto. Ezali mpenza solo.

328 Nzoka nde, bisu tondimaka etumbu ya Seko na seko te. Tondimaka ete lifelo ya móto ezali, móto na sufulu, kasi tondimaka te ete móto yango ekopela libela na libela; soki ezali bongo, okozala na Bomoï ya Seko. Bomoï na Seko ezali bobele moko; Eutaka epai na Nzambe. Pe ezali solo. Okozika, ntango mosusu kati na mibu milió, mibu milió zomi, nayebi te, kasi okoki kozua Bomoï na Seko te. Okoki kozika bileko na bileko te. . . Okoki kozika bileko na bileko, kasi Seko na seko te. Bomoni, bokeseni ezali kati na Seko na seko ná bileko na bileko. *Bileko na bileko*, ezali kati na bileko na bileko, likangisi moko ezali, oyo elingi koloba “na kati na ntango.” Kasi, Seko na seko, etumbu ya Seko na seko ezali te.

329 Ozali na Bomoï ya Seko, mpo ete lolenge ya Bomoï na Seko ezali bobele moko. Pe moto oyo azali na Bomoï ya Seko, azali kobika pe apambolami na Nzambe libela.

330 “Kasi molimo oyo esali lisumu, molimo yango eko. . .” Nini? [Losambo balobi: “. . . ekokufa.”—N.D.E.] Ya solo. Bongo, molimo yango ezali na Bomoï ya Seko te. Solo mpenza. Ekozua—ekozua etumbu na yango, kasi Bomoï ya Seko te.

331 Bongo, bomoni, makambo ya koteya ezali naino mingi, oyo tokomona nsima. Nkolo apambola bino.

332 Sikawa toyemba nzembo kitoko ya kala oyo, na ntango ndeko na biso ya mwasi azali kokende kuna. Nandimi ete mwasi oyo, asengeli. . .

333 Rosella, oyo nde mama na yo? [Ndeko mwasi Rosella alobi: “Iyo.”—N.D.E.] Ee, ezali malamú mpenza! Nazali na esengo ya komona yo kosala yango, ndeko mwasi. Ezali kitoko mingi.

334 Rosella Griffin, moko na baninga na biso ya bilenge ya kitoko koleka. Azali elenge mwasi moko oyo azalaki molangwi masanga; ekoki kozala ete bamosusu na kati na bino baoyo bozali awa, boyebi ye te. Rosella, ekotungisa ye te soki nalobi yango. Ntango ayaki na eteyelo, kuna na—na, esika. . . awa na Indiana. Soki bosilá komona moto ya mawa, ezalaki nde ye, molangwi masanga ná miso lokola moto azali kolala mpongi. Nzoka nde, minganga minene minei ya Chicago balobaki ete ye azali. . . Lisanga ya bato oyo basalisaka balangwi masanga, ná bamosusu nyonso, basundolaki ye. Kasi na mpokwa moko, ayaki na losambo, Molimo Mosantu atalisaki bomoï na ye polele pe Alobelaki ye kaka wana. Ekataki likambo.

³³⁵ Botala ye sikawa, nabanzi, azali na mibu ntuku misato na ndambo, okoki kokanisa ete azali na yango zomi na mwambe; elenge mwasi kitoko, kitoko mpenza. Amelá lisusu masanga ya móto mokolo moko te banda wana; azali lisusu na mposa na yango te. Azali kobika mpo na Klisto, azali kotambola na babalabala, bisika nyonso, kotatola mpo na nkembo na Nzambe, epai na basumuki pe balangwi masanga, na ba-kartié ya lokumu mabe, pe nyonso mosusu, na Chicago mobimba, azali kosala eloko moko mpo na Nkolo.

³³⁶ Aзуaki libatisi na Nkombo na Nkolo Yesu, pe na mpokwa ya lelo mama na ye ayei kosala kaka likambo yango; soki Nzambe moko akokaki kobikisa ye, soki Yesu akokaki kobikisa ye. . . “Nyonso oyo bokosala na maloba to na misala, bosala nyonso na Nkombo na . . .” [Losambo balobi: “Yesu Klisto.”—N.D.E.] Yango nde oyo Biblia elobi. Ya solo.

³³⁷ Malamu, sikawa tokosala mosala ya kobatisa bato. Tokoboma minda na mwa ntango moke, wana tozali komilengela mpo na mosala oyo, ya kobatisa, pe—pe na nsima, tozali kolikia ete tokolekisa ntango malamau kati na Nkolo.

³³⁸ Yo moto okosala mosala ya kobatisa na mpokwa oyo? Malamu, ekozala malamau—ekozala malamau omilengela. Pe ngai nakobanda, nakokamba nzembo pe nyonso, na ntango tozali kokota na mosala, bongo. Na ntango bazali kosala. . . [Ndeko Neville alobi: “Bilamba ezali na nsima awa, Doc?”—N.D.E.] Bilamba ya libatisi, Doc, sala nokinoki. Malamu.

³³⁹ Bongo, tika toyemba moko na nzembo kitoko wana ya kala. . . [Ndeko Branham azali koyembisa nzembo na losambo, na ntango Ndeko Neville azali kobatisa ndeko mwasi yango.—N.D.E.]

³⁴⁰ [Eteni oyo ezangi maloba na bande—N.D.E.] Pe liboso ya kosala yango, wana tozali kozonga, tosengeli kosala nini?

Tomema Nkombo na Yesu,
Tofukama na makolo na Ye,
Mokonzi na bakonzi na Lola, tokolatisa Ye
motole,
Ntango mobembo na biso ekosila.

Malamu, totelema!

Mema Nkombo na Yesu,
Mwana na bolozu pe na mawa;
Ekopesa yo esengo pe libondisi. . .

³⁴¹ Nakoyebisa bino eloko tokosala. Baluka pe pesa mbote ya loboko na moto moko kuna, pe loba: “Mbote ndeko? Nazali mpenza na esengo mingi ya kozala na losambo elongo na yo.”

Nkombo kitoko, O ya boboto!
. . . esengo na Lola;
Nkombo kitoko, Nkombo kitoko, O . . .



MOMBOTO NA NYOKA LIN58-0928E
(The Serpent's Seed)

Liteya oyo ya Ndeko William Marrion Branham, eteyamaki liboso na Ngelesa na mwa lomingo na mpokwa, mokolo mwa 28, sanza ya libwa, na mobu 1958, na Branham Tabernacle na Jeffersonville, Indiana, U.S.A., ekamatamaki uta na bande pe ekomamaki na mobimba na yango na Ngelesa. Ndimbola oyo ya Lingala ekomami pe ekabolami na Voice Of God Recordings.

LINGALA

©2014 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Liyebisi ya makoki ya mokolo-eloko

Makoki nyonso ekopesama na ndingisa. Búku oyo, ekoki kozala imprimé na masíni ya ndako mpo na yo moko to kokabama, ofelé, lokola esalelo mpo na kopalanganisa Nsango Malamu ya Yesu Klisto. Búku oyo ekoki kotekama te, koyíkanisama te, kotiana na site internet te, kobombama mpo na kolukaluka te, kolimbolama na nkota mosusu te, to kosalela yango mpo na kosenga misolo te, kozanga ndingisa ekomami mpenza na Voice Of God Recordings®.

Soki olingi koyeba makambo mosusu to kozua bisalelo mosusu, komélá:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org